

欽定四庫全書提要

治河圖畧一卷元王喜撰喜爵里無考其書首列六圖圖末各系以說而附所爲治河方畧及歷代決河總論二篇於後其文稱臣謹敘臣謹論云云疑爲經進之本考元史順帝紀及河渠志至正中河決白茅堤金堤大臣訪求治河方畧喜書其作於是時歟其大旨取李尋因其自然之說惟以浚新復舊爲主厥後卒用賈魯之策疏塞並舉挽河東行以復故道與是編持論相合則當時固已採錄其言矣特史文闕畧未著其進書本末耳卷中所圖河源頗多訛舛蓋崑崙星宿遠隔窮荒自

我



國家底定西陲悉嶺于闐悉歸版籍於是河有重源之蹟  
始確然得其明徵元人所述憑潘昂霄之所記昂霄所  
記憑篤什宋篤什舊作都寔今改正之所傳輾轉相沿率由耳食撰  
元史者且全錄其文於河渠志以爲亘古所未聞喜之  
踵訛襲謬又何怪乎取其經畧之詳而置其考據之疎  
可也

### 原序

臣竊謂水之在天下有自然之利亦有自然之害順而導之  
者易爲力逆而遏之者難爲功譬猶人之一身血脉流通則  
無病血脉壅滯則病生審而治之宣其壅滯使之流通則病  
自去治水之道亦當如此竊見比年以來黃河失道汎濫曹  
濮間生民墊溺中原彫耗莫此爲甚以致上干宵旰之憂勤  
次勞廟堂之軫念見者聞者莫不惻然思有以救之然未有  
出一謀建一策有補於明時者以其但知河之爲害而未知  
其所以爲害臣故歷考累代河流變遷之故與浚治之術粗  
得其詳而知其有無不可爲之理且何以言之皆緣下流壅  
滯水勢不能自泄是以決溢爲害爲今之計莫若浚入淮舊



治河圖畧序  
河于南以順其流仍導一新河于北以分其勢大河既分其流自緩無泛溢之患矣禹之播九河漢之浚屯氏宋之導清河于南北者卽此道也猶百鈞之物一人舉之則力不能勝兩人舉之則力有餘此理甚明可舉而行今將禹河漢河宋河今河圖陳於左以備睿覽有以考擇庶幾拯溺之一助云  
王喜謹序

治河圖畧


墨海金壺

史部


元王喜撰

歷代河圖







禹河之圖



臣謹案禹河自于闐葱嶺兩源合流東注蒲昌海潛行南出積石經龍門三千里而至于華陰又自南而東至于底柱孟津洛汭大伾又自東而北過泲水大陸迤邐北行至冀東兗北分播于九河趨碣石入海由是觀之氣分則緩勢分則弱禹所以治河之法行水之道其功皆在於九河之播也蓋自大伾以下行於平地河勢悍猛而平地土疏非堤防所能捍禦故開八條以殺其怒又自大陸以北到兗州地方爲下流之衝其勢愈大爲害愈甚禹則當其將入海未入海之處疏其正派分其支流使都入於海各派旣安行於外正流亦順道其中不復漫流爲害其到此而不得不分者亦勢之必然也




漢河之圖



臣謹案漢河自孟津底柱以上河行地中無所變遷自大伾以下河高於地易於泛濫自周定王時已徙故瀆及漢元光間改向頓邱東北流經濮濟從樂陵入海文帝時決酸棗武帝時決瓠子皆在今濮陽縣遂通淮泗又漢溝洫志河決館陶在今濮州分爲屯氏河在今大名路北流入海其河深廣與大河等蓋亦因其自決之勢就浚此河以泄大河故無復有汎溢之患繇是觀之河之下流壅則塞泄則平漢之所以能息菑弭患者其功專在於屯氏之分也



宋河之圖



南

淮

海

汴水受陳留  
沒儀陰溝至  
蒙為灘水東  
入于淮蒙澤  
在今考城縣

徐

邳

睢

宋

單

宋河與濟水合流末分為二道

南清河入淮

汶

東

東平

大邑


濟寧鉅野

河間

大名

大都

通



汴

鄭

孟

洛

懷

中

衛

滑

開

淮

曹

自澤

滑州

滑

河

龍門

子圖

海昌蒲

葱山伯

臣謹案宋河自建紹

按建隆紹聖相距百四十年南渡建炎紹興黃河北屬金界維紹聖至建中靖

國初中間纔五六年宋河渠志載議河事最多疑為紹建之誤後仿此

浚黃河決入鉅野溢于

泗以入淮謂之南清河由汶合濟至滄州入海謂之北清河

初禹導濟水出河之南東入荷澤即今之梁山泊也南通淮

泗北從千乘入海宋河既徙濟寧之鉅野與濟遂合于一分

而為南北流矣又濟之上流舊有葭蕩渠漢明帝使王景浚

之東注浚儀南達于淮即隋唐之汴口也金末河決開封則

又因汴南流而入于淮矣今其決于曹濮復有合濟之勢臣

愚所以參之於古審之於今而知其有必合之理也



北

大都

冀

太原

積石

慈嶺

海昌浦

于闐

岷

渭水

龍門山

漳源

洛

梁

衛

河中

懷

孟津

原柱

華山

洛

御河

馬河 德彰

金腰 鄧子 開

滑

白馬 封邱 烽火臺

北平口 白馬口

北平口 白馬口

開

滑

魏

開封

汴

陳

南

今河之圖

大直沽

通

臨河

梁山

東平

漢 清河 來馬

東

泗

海

石

新

單

歸德

濮

曹

大名

河間 巨野

濟河

北河

此處沙土壅積

東河

毫

徐

大康

潁

邳

睢

大堤

臨沂



淮

河圖

河圖

臣謹案今河自金末從開封北衛州決入渦河南流卽今之過徐州而入淮者是也比年以來河水汎溢于曹濮而入淮舊河淤塞不通將有人御河之勢又未得其道以致數郡墊溺爲害不小竊料新塞河道沙土尙虛但浚治稍深則水復故道下流自順非比無源之水必假強鑿之難勞而無功也又計今新決河水散漫無統未有歸一以致橫流若舊河旣浚水勢自減然後因其橫流所穿之徑順其北流之勢加之疏導別爲一川則用力寡而見功疾此可爲永久之利也







治河之圖

臣謹謂治河之法必先浚入淮舊河使水南流復於故道次  
導入濟新河分半水北流以殺其勢此上策也今汴城之東  
黃河南岸列渠口數十皆是古時引水注于陳亳宋潁之郊  
以泄水怒又東至杞縣有三汭河口往年歸德太康兩處將  
南北兩汭堵閉不通使三汭之水總于一河安得不致決溢  
哉世祖皇帝嘗設置分監委任都水馬和之郭若思疏決新  
河之水導黃流由安山抵臨清接御河相地形設開隄通漕  
運遂成千載之功今所以導新河北流者卽馬都水之成法  
也蓋河之末流水勢浩大非一川能容不浚則勢不順不分  
則患不息是皆歷代已行之明效而非一口之空言臣故圖  
此以見其有可行之理耳



河源之圖



大河圖

大河圖



臣按河源自吐蕃朶甘思西鄙方七八十里有泉百餘泓躡  
高山下瞰燦若列星故名火敦卽星宿海也東滙于澤又東  
爲齊必勒一水西來名赤里出一水南來名忽蘭一水東南  
來名也里朮合流名脫可尼是爲黃河又東歧爲九渡尙清  
淺可涉又東五百里始渾濁奔悍又三千里合二水折西經  
乞里塔崑崙山之陰四時積雪又北東至貴德州隸河州吐  
蕃等處宣慰司所轄然後抵積石與禹貢導積石者合上去  
星宿海蓋六千七百餘里此據世祖皇帝至元十七年遣招  
討使篤什親歷而言臣所以并紀此圖以知河源之遠宜其  
末流之盛大而難制也

### 治河方畧

臣竊謂水之爲利生民之所不可闕有國之所不可無關於  
利害至重矣歷代之虞衡水部本朝之都水監所以總天下  
之水而重其事也而黃河之水又天下之至大者今其決溢  
爲害下病生民上累國家不可視爲尋常細事明矣必也重  
其事委重於大臣旁求良策而後可以息菑弭患臣雖不敏  
旣圖陳于前復謂所以息菑弭患者必本於理勢之自然而  
其要則在於浚舊河導新河二者而已所以能息菑弭患者  
又必仰於人力之使然而其要則在於專委任優工役二者  
而已故敢以四事條列于後 一先浚舊河合於上流淤塞  
處約以十里二十里爲率挑出沙土令深或底下見流沙則



縛木解平置沙面爲河水立脚之地仍於兩旁立桔槔長竿  
提出沙土漸淘漸洗使水得行上流旣通則下流自然滔滔  
有建瓴之勢不待施工而自順若河水已循其故道或可使  
之全流入淮則于決河北岸用竹絡木櫃等盛石塊壘成河  
堤雖非久遠之計亦可採患於一時故不如因其自決之勢  
分爲兩道最爲得宜要在察其逆順審其形勢隨宜量度之  
耳議者莫不以爲舊河沙土壅積如此之高新決河水如此  
之深豈能使之復於故道此自今日所見之勢而言也然所  
積沙土高者雖有一丈以來低者不下五七尺皆是近年淤  
積非天生堅頑之物固可以人力去之况其下旣有流沙乃  
是水脉尙通與決河相平故其餘流浸漬特以沙土壅隔不  
得流耳浚而治之必有成功是皆他日未形之勢人所未見  
者也因謂龍門萬仞之顛四山皆石禹尙以人力鑿之以通  
河道况今河行平地沙土之中決諸東方則東流決諸西方  
則西流者乎此臣斷斷以爲舊河有可浚之理也 一後導  
新河浚舊河則始上流導新河則始下流蓋舊河旣浚河流  
旣分泛濫之水漸平却於下流因其所穿之徑順其勢導一  
川從北清河入梁山泊合御河入海又分一道入南清河合  
泗水入淮如此則南北閘河水增舟順可無啓閉之勞而國  
家永享其利抑且桑土悉平可以耕植有倍收之獲而民蒙  
其利議者莫不以爲大河入梁山泊則必衝壞閘河直趨東  
平爲害不小殊不知河流旣分力弱勢緩不足爲害且以舊



事證之前宋建紹時魯從濟寧鉅野決入其時全河入于濟水下流分爲二道一道從南清河入淮一道從北清河入海尚且不聞其破閘河害東平也况今於上流已分半水入汴河其一半入濟水者又分爲南北則入于梁山泊者僅四之一耳而梁山泊八百里之寬足以渟蓄其怒波則下流自然平緩可保其無患矣此臣斷斷以爲新河有可導之理也一專委任宜選在朝明達大臣一員充總領河防使一應河道合于事務便宜行事仍選有學識有材幹之士以爲之屬同心講究務在兼採衆長取人爲善參酌審量底於功成至如董工役備器物司出納掌簿書則各有司存一優工役宜募民擇丁壯者爲河夫十人爲甲前期給散僱工錢必令稍優使之樂從盡力工作其有不趨事者罰及甲長仍禁有司毋得因而差發擾重困一方其鐵匠木匠常用製造器具不致乏用至如醫工亦所不可缺者或河夫疾病傷損必官爲醫療仍給半糧優恤之凡連年被水菑去處亦須賑贍之使得以復業

歷代決河總論

臣竊謂洪水之害莫甚於河治水之功莫難於河鑿龍門于上以疏其源播九河于下以殺其流者大禹敷治之功也蓋源疏則水性順流殺則水勢分臣所謂分河之說實原于此自禹功一立地平天成垂七百七十餘載無復爲患及商之祖乙始圯于耿而河之經流固未嘗改也又九百四十餘載



至周定王之五年河徙砠礫乃改其故瀆春秋戰國各私其地壅防百川以鄰為壑故葵丘之會有曲防之戒意者九河或湮或塞皆在此時以及漢之文帝決酸棗瀆金隄嘗與卒塞之矣武帝時徙頓邱決濮陽瓠子遂通淮泗汎郡十六害及梁楚雖發卒十萬塞之輒復橫潰上去周定王又四百九十二年然後益徙而東田蚡乃狃於私田之利以為江河之決皆天事未易以人力強塞由是二十年置弗治及東封泰山臨決河沉白馬玉璧率羣臣負薪填決河築宣防導河北行浚屯氏以分大河使復禹舊跡八十年不為害此則分河之明效也成帝時馮遂奏言屯氏河塞靈鳴犢口又益不利獨一川兼受數河之任雖高增堤防終不能泄九河今既難

明請浚屯氏河以助大河泄暴水備非常而丞相御史不以為意後果大雨水決金隄灌四郡三十二縣百姓多墊溺敗壞官亭室廬且四萬區蓋屯氏一塞下流不利以致為害此其驗也尋遣王延世為河隄使者以竹絡長四丈大九圍盛以小石兩船夾載而下之三十二日隄成其後李尋議以為常欲求索九河故道而穿之今且因其自決勿塞以觀水勢河欲居之當自成川挑出沙土然後順天心而圖之必有成功而用力寡遂止不治朝臣以為百姓可哀遣使者據業賑贍之按前漢書據業作處業師古曰處業使安處之得居其業乃求能浚川者於是賈讓言治河有三策大旨以為土之有川猶人之有口治土而防其川猶止兒啼而塞其口豈不遽止然其死可立而待也故



善爲川者決之使道善爲民者宣之使言宜徙民放河北流入海出治隄之費以業所徙之民勿與水爭地此功一立千載無患此上策也多穿漕渠於冀地使民得以溉田分殺水怒雖非聖人法然亦捋敗之術此中策也若乃繕完故隄增卑培薄勞費無已數逢其害此下策也自今觀之李尋之言最爲近理今所謂因其自決之勢順其自然之性別導一川者卽其說也至如賈讓之策似若可取孰爲審之則有未然者其曰徙民放河置而不治則泛濫東西漂泊南北日徙其民猶不足將何以安其生耶其曰多穿漕渠分殺水怒其說近是而又未知河之末流有必分之勢其曰隨決隨塞勞費無已爲下策者誠哉是言也自漢而下決溢之患雖代有之而其終流至宋又千二百五十餘載始改于鉅野尋又改于開封由禹距今上下二千七百餘載而河流三徙其瀆豈有不假人力之助而遂如斯安流耶方今明見如馮逸材敏如王延世謀議如李尋賈讓者豈乏其人我朝如馬和之郭若思引黃流由安山接御河相地設牖築隄皆能深知水性以成事功蓋亦不爲無人舉而措之又何難焉臣以後學戇愚切念生際盛明沐浴膏澤未有涓埃之報恆懷畎畝之憂觀黃河之橫流哀赤子之墊溺譬有病而必療寧無方之可施庸獻其一得之愚庶或助萬分之補捧漏卮沃焦釜謂宜莫急於此時歌瓠子築宣防端可追功於前代臣謹論



治河圖畧終

皇清嘉慶十六年歲在重光協洽春病月昭文張海鵬較梓



欽定四庫全書提要

中吳紀聞六卷宋龔明之撰明之字希仲號五休居士崑山人紹興間以鄉貢廷試授高州文學淳熙初舉經明行修授宣教郎致仕是書採吳中故老嘉言懿行及其風土人文爲新舊圖經范大成吳郡志所不載者仿范純仁東齋紀事蘇軾志林之體編次成帙書成於淳熙九年明之年已九十有二亦可謂耄而好學者矣宋末書已罕傳元至正間武寧盧熊修蘇州志訪求而校定之明末常熟毛晉始授諸梓亦多舛謬其子辰後得葉盛棗竹堂藏本相校第六卷多翟超一條其餘頗有異同何焯假以勘定極爲精審然盧熊跋稱其子昱所



撰行實附後今兩本皆無之則葉本亦不免於脫佚也

其說之無傳也口授小子豈俾抄其大端藏之篋衍不惟可  
以稽考往跡資助談柄其間有裨王化關士風者頗多皆新  
厭見者往往後輩所未喻今年九十有二西山之日已薄恐  
與笑談者無復有鴻儒矣竊嘗端居而念焉凡疇昔飮聞而  
絕不復往由是聲迹益晦陋瓜疇芋區不過老農相爾汝所  
亦多文人行揭德振華咸有可紀厥後世異事變利門名路  
典刑於親炙之久乃從事於進取虞庠魯泮餘三十年同舍  
未嘗不注意高仰云少長從父黨游皆名人魁士及又獲識  
明之幼嘗逮事王父每聞講論鄉之先進所以誨化當世者  
吾家自先殿院占籍中吳距今幾二百禩相傳已及雲仍矣  
原序

原序

其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也  
其風士人文為海濱書園餘或大知失傳志也



舊圖經及夫地志所不載者鬼神夢中雜置其間蓋效范忠文東齋紀事體談諧嘲謔亦錄而弗棄蓋效蘇文忠公志林體皆取其有戒於人耳豈新學小生屬意不倫措辭無法不可以爲書予意爲是不滿必得老於文者彙括之庶幾不爲撫掌之資而使後之人誦其所聞以代莊舄之吟爾淳熙元年中和日宣教郎賜緋魚袋致仕龔明之期頤堂書

中吳紀聞目錄

卷一

范文正公

許洞

丁陳范謝

辟疆園

鬪百草

陳君子

梅聖俞與僧良玉詩

半夜鍾

白樂天

六經閣記

唐郎官題名

丁晉公

解額

紅蓮稻

陸宣公

太乙宮

孫百篇

蘇子美



紅梅閣

先高祖

趙霖水利

黃氏三夢

崑山編

臯橋詩

謝賓客

張子野吳江詩

春申君

蔣密學

丁晉公拜老郁先生

李璋

木蘭堂詩

林大卿買宅

富祕監

智積菩薩

三江口

楊惠之塑天王像

王運使減租

鬪鴨

卷二

姚氏三瑞堂

丁氏賢惠錄

張文定公知崑山

傳燈錄

曾大父

婁侯

滕章敏公

滄浪亭

范文正公復姓

鄭宣徽

五柳堂

中隱堂三老

林氏儒學之盛

國一禪師

葉少卿

二游詩

安定先生

蘇子美飲酒

張伯玉郎中

上方詩

陳龍圖使高麗

樂圃先生

海涌山

盧通議

閭門樓詩

章守子用皂蓋

隨緣居士

石點頭

軌革卦影

夢石天王像

改正洪範篇

范文正四子

林酒仙

章岷

鮑魚

徐都官九老會

卷三

葉道卿

觀風樓

三高亭

程光祿

晉公飯僧疏

蔡君謨題壁

郝正夫

陳君子父殿丞

鬱林石

謝希深

范文正還鄉

清遠道士詩

幽獨君詩

本禪師

吳王拜郊臺

范貫之

南翔寺

張敏叔

崑山夫子廟

孫子和

張翰

皮日休

橋名

賀方回

白公檜

癸甲先生

方子通

破山詩



甫里

有脚書廚

泰娘

南園詩

朱子奢

錢氏納土

白馬澗

禪月大師

卷四

太公避地處

范忠宣公

滕章敏公結客詩

思賢堂

顧學正

鄭希尹

執爨詩

王元之畫像

雙蓮堂

孫若虛滑稽

慧感夫人

元少保

仲殊

如村

鄭毅夫吳江橋詩

張幾道挽詩

范文正不取燒煉方

夜航船

俗語

方子通詩誤入荆公集

盧發運

大雲翁

花客詩

中吳

祖姑教子登科

范祕丞

徐朝議

顏夫子

信義縣

李無悔

鱗

大本錢王後身

郝正夫失鶴詩

黃姑織女

孫積中

王主簿

著作王先生

卷五

唯室先生

姑蘇百題詩

范祕書

張子韶與周煥卿簡

蝦子和尚

郭家朱砂圓

陳了翁鱸鄉亭詩

起隱子

閻邱大夫

寶嚴院

洞庭山

方子通紅梅詩

范無外

綽堆

陸彥猷

翠微集

生老病死

邾子高

鄭應求相

獄山

王學正

范文正為閻羅王

吳縣寇主簿詩

盤溝大聖

魏令則侍郎

圖經刊誤

草腰帶聽聲

壓雲軒詩

翟忠惠

白雲泉

謂三命

范文正祠

臞庵

蠡口

蛇化為劍

賈表之

易承天為能仁寺

章戶部



王教授祭學生文

沈元叙滄浪亭詩

卷六

西樓詩

郭仲達

凌佛子

岷山學記

王唐公

顧景繁

慈受禪師

蔣侍郎不肯立坊名

孫郎中

潘悅之侍郎

南北章

余良弼占卦影

王彥光

狀元識

四幡之助

樂庵

吳江詞

石湖闕

丁令威宅闕

周朝宗闕

蘇之繁雄冠於浙石闕

朱光祿闕

翟超闕

正訛闕

叔父記館中語闕

徐聖望

羊充實

蘇民三百年不識兵

之彝老

紀異

朱氏盛衰

徐稚山

無庵

結帶巾

周妓下火文

諧謔

思韓記

徐氏安人詩

吳中水利書

中吳紀聞卷一

墨海金壺 史部

范文正公

宋龔明之撰

天聖五年范文正公居母喪上書宰執請擇郡守舉縣令斥  
游惰去冗僭遴選舉崇敦教育養將材實邊備保直臣斥佞人  
使朝廷無過生靈無怨以杜奸雄凡萬餘言時王文正公會  
爲相見而偉之服滿薦充館職由此爲人主所知不次擢用  
慶歷三年九月拜參知政事上開天章閣訪以治道公條陳  
當世急務十條一曰明陟黜二曰抑僥倖三曰精貢舉四曰  
擇官長五曰均公田六曰厚農桑七曰修武備八曰覃恩信  
九曰重命令十曰減徭役上嘉納之一歲之間次第舉行無



或遺者公初上宰相書即受知於王文正後陳十事即見聽於仁宗雖曰抱負奇偉不容不見於施設自非聖君賢相委曲信任之亦安能行其所學邪

### 許洞

許洞太子洗馬仲容之子

洗馬墳在城西

登咸平三年進士第平生

以文章自負所著詩篇甚多當世皆知其名歐陽文忠公嘗稱其爲俊逸之士所居惟植一竹以表特立之操吳人至今稱之曰許洞門前一竿竹真廟祠汾陰時洞爲均州參軍在路獻文章令召試中書

予之族妹適洞之曾孫見其家藏洞之敕牒三四紙

洞與潘閔錢易爲友狂放不羈閔坐盧多遜黨亡命乃變姓名僧服入中條山洞密贈之詩曰潘逍遙平生才氣如

天高倚天大笑無所懼天公喚汝口呶呶罰教臨老頭補衲歸中條我願中條山神鎮長在驅雷叱電趕出這老怪

### 丁陳范謝

錢武肅王鏐之子廣陵王元璿廣陵王之子威顯王文奉皆爲中吳軍節度使開府於蘇時有丁陳范謝四人者同在賓幕丁諱守節陳諱贊明范諱夢齡謝諱崇禮職中吳軍節度推官俱以長者稱守節者丞相謂之祖贊明者屯田之奇字虞卿之曾祖夢齡者參政仲淹之曾祖崇禮者太子賓客濤之父其子孫又皆登高科躋膺仕足見慶源深厚矣

### 辟疆園

吳中舊傳泚館林木之勝惟辟疆園爲第一辟疆姓顧氏晉



人見於題咏者甚衆李太白云柳深陶令宅竹暗辟疆園陸羽云辟疆舊林園怪石紛相向陸龜蒙云吳之辟疆園在昔勝槩敵皮日休云更葺園中景應爲顧辟疆近世如張伯玉亦云于公門館辟疆園放蕩襟懷水石間今莫知其遺跡所在

### 鬪百草

吳王與西施嘗作鬪百草之戲故劉禹錫詩云若共吳王鬪百草不如應是欠西施

### 陳君子

陳之奇字虞卿鄉人以其有賢德故以君子稱之初登第爲鄱陽尉後爲丹徒泰興令李璋尙秦國大長公主下國子監舉通經術有行義者爲教授遂以公充選未幾乞致仕遷太子中允時年未五十俄除平江軍節度掌書記復以爲教授詔裝錢促遣之力辭不赴公道德著於鄉雖閭巷小兒亦知愛敬有爭訟久不決者跨蹇驢至其家以大義感動之皆爲之革心自掛冠後閑居十八年熙寧初卒葬花山王岐公爲作志題之曰陳君子墓銘始公之謝事也蔣堂侍郎語人曰舉天下皆知有富貴而虞卿獨以知止易衆人之心吾喜林下有人矣因爲賦詩曰寵秩拜春坊歸休識慮長掃門卑魏勃設醴謝元王一水蓴鱸國羣山橘柚鄉喜君添老社煙駕尙徇羊張伯玉郎中亦贈之詩曰東吳王孫歸掛冠玉絲紅鱸滿雕盤狂吟但覺日月久醉舞不知天地寬小圃移花山



客瘦夜窗搗藥橘童寒新書近日成多少且告先生旋借看

梅聖俞與僧良玉詩

崑山慧聚寺僧良玉字蘊之僧行甚高旁通文史之學又善書工琴棋因游京師梅聖俞見而喜之以姓名聞于朝賜以紫衣其東歸也聖俞以詩送之曰來衣茶褐袍歸變樵色服扁舟洞庭去落日淞江宿水煙晦琴徽山月上巖屋野童遙相迎風葉鳴椽榭後潛遁故山專以講經為務號所居曰雨花堂

半夜鐘

唐張繼宿楓橋詩云月落烏啼霜滿天江村漁火對愁眠姑蘇城外寒山寺夜半鐘聲到客船昔人謂鐘聲無半夜者詩

話嘗辨之云姑蘇寺鐘多鳴於半夜子以其說為未盡姑蘇

鐘唯承天寺至夜半則鳴其它皆五更鐘也此張繼詩王氏學林新編誤以

為溫廷筠

白樂天

白樂天為郡時嘗攜容滿蟬態等十妓夜遊西武邱寺嘗賦紀游詩其末云領郡時將久遊山數幾何一年十二度非少亦非多可見當時郡政多暇而吏議甚寬使在今日必以罪去矣

六經閣記

姑蘇自景祐中范文正公典藩方請建學其後富郎中嚴維之又建六經閣張伯玉公達嘗為郡從事遂命為之記今但



傳其篇首數句聞見錄又誤載其始末予家偶藏公達所著蓬萊集恐後人不復見全文也因具載之六經閣子史在焉不書尊經也吳郡州學始由高平范公經構之其後天章蔣公待制中書柳舍人史館昭文張陸二學士行郡事殿中丞李仲塗先生之猶子中臺柳兵曹今尚書富郎中十年更八政仁賢繼志學始大成而口口六經閣又建先時書籍草創未暇完葺廚之後廡澤地汗晦日滋散脫觀者惻然非古人藏象魏拜六經之意至是富公始與吳邑長洲二大夫以學本之餘錢餽之市材直公堂之南臨泮池建層屋起夏六月乙酉止秋八月甲申凡旬有七浹計庸千有二百作楹十有六棟三架雷八桷三百八十有四二戶六牖梯衝棗稅圻壤

陶鬻稱是祈於久故爽而不庠酌於道故文而不華經南嚮史西嚮子集東嚮標之以油素揭之以油黃澤然區處如蛟龍之鱗麗如日月之在紀不可得而亂大抵天地之極致皇王之高道生人之紀律盡在是矣古者聖賢之設教也知函夏之至廣生齒之至衆不可以頤解耳授故教之有方導之有源乃本庠序之風師儒之說始於邦達於鄉至於室莫不有學烜之以文物聳之以聲名先用警策其耳目然後清發其靈府故其習之也易其得之也深其教不肅而成不煩而治毆元元之入善域優而柔之使自得之萬世之後尊三王四代法者無他焉教化之本末馴善也然則觀是閣者知六經之在則知有聖人之道知有聖人之道則知有朝廷之化



知有朝廷之化則嚮方之心日懋一日禮義之澤流于外絃歌之聲格于內其爲惡也無所從其爲善也有所歸雖不欲徙善遠罪納諸大和不可召康公之詩曰豈弟君子來游來歌子思之說云布在方策人存則政舉凡百君子由斯道治斯民暢皇極序彝倫者舍此而安適得無盡心焉諸儒謂伯玉嘗從事此州游學滋久宜刊樂石庶幾永永無忽

### 唐郎官題名

唐郎官題名碑承平時在學舍中堂之後已漸剝缺兵火後不復存矣序文乃張長史楷書長史以草聖得名未嘗作楷書世尤愛之題名之人雖不一亦盡得古筆法唐世崇尚字學用此以取人凡書皆可觀今所傳止序文爾長史蘇人故

### 立碑於此

丁晉公

祖守節吳越中吳軍節度推官

公諱謂字謂之家世於冀其祖仕錢氏遂爲吳人公少負才名先叔祖端公在鼎州日公嘗贅文求見因贈之詩曰膽怯何由戴鐵冠祇緣昭代獎孤寒曲肱未遂違前志直指無聞是曠官三署每傳朝客說五溪閑凭郡樓看祝君早得文場雋况值天階正舞干淳化三年公登進士科名在第四與孫何俱有聲當時王黃州有詩云三百年來文不振直從韓柳到孫丁如今便合教修史二子文章似六經祥符中爲參知政事上問唐酒價幾何公曰每斗三百按杜甫詩速宜相就飲一斗恰有三百青銅錢又侍宴賞花釣魚公詩云鸞鷲鳳



輦穿花去魚畏龍顏上鈞遲上賞詠再三羣臣皆以爲不及  
天禧中拜相仁宗卽位進司徒兼侍中後爲章聖山陵使擅  
移陵域貶將仕郎崖州司戶參軍公自遷謫日賦一詩號知  
命集後因奏表叙策立之功有云雖遷陵之罪大念立主之  
功多因徙雷州移道州復祕書監光州居住貶竄十五年鬚  
髮無斑白者人皆服其量臨終半月不食焚香危坐誦佛書  
以沈香煎湯時呷而已至光州謝執政啓有云三十年門館  
從游不無事契一萬里風波往復盡出生成在海上對客問  
天下州郡孰大客曰唯京師公曰朝廷宰相只作崖州司戶  
則崖州爲大眾皆大笑歸葬華山所居在大郎橋號晉公坊  
堂宇甚古有層閣數間臨其後予嘗至其第與公之孫德隅  
游德隅善篆亦工於四六

### 解額

姑蘇自祥符間定制秋舉以四人爲額慶歷中就舉者止二  
百人范貫之龍圖嘗作送錢正叔赴舉序已言四人之額視  
他藩爲最寡熙寧元豐間應舉者漸多增爲六人三舍旣行  
罷去科舉法歲貢四人舍法罷乃合三年之數爲十二人紹  
興丙子又增流寓一名今終場者幾二千人其額又不勝其  
窄矣

### 紅蓮稻

紅蓮稻從古有之陸魯望別墅懷居詩云遙爲晚花吟白菊  
近炊香稻識紅蓮至今以此爲佳種



陸宣公

唐書云陸贄蘇州嘉興人按武德中蘇州所管七縣而嘉興本號長水縣改爲由拳又改爲嘉禾吳赤烏中方易今名也

太一宮

太平興國六年方士言五福太一在吳越分太一天之貴神也行度所至之國民受其福故今蘇州建太一宮後以地遠不便於禱祀遂於京城蘇村建之今天慶觀乃其舊址鄉人尚有以宮巷宮前稱者

孫百篇

吳士孫發嘗舉百篇科故皮日休贈以詩云百篇宮體喧金屋一日官衙下玉除陸龜蒙亦有云直應天授與詩情百咏唯消一日成其見推於當時如此此科不知創於何代國初亦無定制惟求應者卽命試太平興國五年有趙昌國願試此科帝御殿出四句詩爲題詩云松風雪月天花竹鶴雲煙詩酒春池雨山僧道柳泉每題五篇篇四韻至晚僅成數士首方欲激勸後學特賜及第仍詔今後應此科者約此題爲式

蘇子美

蘇舜欽字子美易簡參政之孫慷慨有大志工爲古文聲名與歐陽公相上下天聖七年玉清昭應宮災子美以太廟齋郎詣登聞上疏謂天以此垂戒願陛下恭默內省語甚切直時年方二十登景祐元年進士第俄有詔戒越職言事者子



美又上書極論其不可慶歷四年授大理評事集賢校理監  
進奏院當時用事者以子美乃范文正所薦而杜正獻之婿  
也因鬻故紙會客事誣奏之遂除名勒停嘉祐初韓魏公爲  
請於朝追復元官卒年四十一山谷先生嘗有觀祕閣蘇子  
美題壁詩曲盡其平生大節真蹟藏汪玉山家今集中不載  
故見之於此仁祖康四海本朝盛文章蘇郎如虎豹孤嘯翰  
墨場風流映海岱俊鋒不可當學書窺法窟當代見崔張銀  
鈞刻琬琰蠹尾迴縑緗擢登羣玉府高閣日生光春風吹曉  
雨禁直夢滄浪人聲市朝遠簾影花竹涼秋荷湔筆硯怨句  
挾風霜不甘老天祿誠欲升未央小臣膽如斗朱儒捧一囊  
請提師十萬奉辭問犬羊歸鞍飲月支伏背笞中行人事喜

乖忤南遷得夜航此時調玉燭日行中道黃柄臣似牛李傾  
奪謀未臧薄酒圍邯鄲老龜禍枯桑兼官百郡邸報費用歲  
常昭延青雲士共醉椒精觴俗客避白眼徵歌舞紅裳謗書  
動宸極牢戶繫桁楊一網收冠蓋九衢人走藏庖丁提刀立  
滿意無四旁論罪等饕餮囚衣禦方良姑蘇麋鹿曠風月有  
書堂永無湔拔期山鬼共幽篁萬戶封侯骨今成狐兔岡邇  
來四十年我亦校書郎雄文終膾炙妙墨見垣牆高山仰豪  
氣崢嶸乃不亡張侯開詩卷詞章尙軒昂草書十餘紙雨漏  
古屋廊誠知千里馬不服萬乘箱遂令駕鼓車此豈用其長  
事往飛鳥過九原色莽蒼敢告大鈞手才難幸扶將子泌字  
進之任湖北運使

朱殿院之女適參政公之子宿  
宿乃者之弟於子美爲叔父



紅梅閣

吳感字應之以文章知名天聖二年省試爲第一又中天聖九年書判拔萃科仕至殿中丞居小市橋有侍姬曰紅梅因以名其閣嘗作折紅梅詞曰喜輕漸初泮微和漸入芳郊時節春消息夜來陡覺紅梅數枝爭發玉溪仙館不是箇尋常標格化工別與一種風情似勻點胭脂染成香雪重吟細閱比繁杏天桃品流真別只愁共彩雲易散冷落謝池風月憑誰向說三弄處龍吟休咽大家留取倚闌干聞有花堪折勸君須折其詞傳播人口春日羣宴必使倡人歌之吳死其閣爲林少卿所得兵火前尙存于純字晦叔文行亦高鄉人呼爲吳先生

楊元素本事集誤以爲蔣堂侍郎有小鬢號紅梅其殿丞作此詞贈之

先高祖

先高祖諱識給事中諱慎儀之子登端拱元年第大中祥符間用翰林學士李宗諤薦擢監察御史屬眞宗東封護蹕還都遷殿中侍御史兼左巡使時年四十有二本朝承襲唐制御史不專言職至是始擇學術醇正操履端方可以紀綱朝廷者俾入臺言事得之至難故被選者實爲不世之榮先高祖任職踰年遽抱日疾累表乞退遂除檢校司封郎官平江軍節度副使

先高祖登第時金花帖子尙存其制用塗金黃紙大書姓名下有兩知舉花押仍用白紙作一大帖貯之亦題姓名於上近吳南英於周參政處模寫王扶盛京二帖子名士



題跋甚衆皆以爲今世所罕見者予因歸而視其所藏適與王扶同此一榜規模無毫髮不相似但多白紙爲護爾今所謂榜帖者蓋起於此

### 趙霖水利

政和六年莊徽待制爲郡守中使以金字牌奉御筆云訪聞平江府三十六浦內自古置閘隨潮啓閉泄放水勢歲久堙塞遂致積年爲患今差本府戶曹趙霖躬親具逐浦相度經久利害繪圖赴尙書省指說旣被旨因徧歷諸縣遂得其利害霖意不過三說一開治港浦二置閘啓閉三築圩裏田遂條析其事合成一書奏之後略施行霖所建明與郝正夫差異霖專主置閘之說正夫則屬意於開縱浦橫塘使水趨於江而已竊謂二公之論與今日又不同往時所在多積水故所治之法如此今所以有水旱之患者其弊在於圍田由此水不得停蓄旱不得流注民間遂有無窮之害舍此不治而欲興水利難矣

### 黃氏三夢

建寧黃氏乃名族也因游宦遂徙居于吳黃氏有三子皆勤於學問其父忽夢捷夫持榜帖報黃顏者遂以名其長子已而果第久之其夢如初乃拆偏旁名仲子以彥彥復擢高科後數年其夢亦如初黃甚怪之又以頡名其季頡旣第顏卽死矣

### 崑山編



唐人劉綺莊爲崑山尉研窮今古細帙所積甚富嘗分類應用事注釋于下如六帖之狀號崑山編今其書尙存

### 皐橋詩

皐橋者漢皐伯通所居之地梁鴻娶孟光同至吳居伯通廡下爲人春役後伯通察而異之乃舍之於家皮日休嘗賦詩云皐橋依舊綠楊中間里猶生隱士風唯我到來居上館不知何道勝梁鴻陸龜蒙詩云橫絕春流架斷虹凭闌猶想五噫風今來未必非梁孟卻是無人繼伯通

### 謝賓客

公諱濤字濟之其先三世仕吳越公幼而奇敏嘗講學于陽山澄照寺之西廡時王翰林禹偁宰長洲羅拾遺處納宰吳縣皆器重之自此名顯於時登淳化三年第知益州華陽縣通判壽州知興國軍眞宗卽位銳意任人一日中出朝士姓名有治狀者凡二十四人付中書門下令驛召至闕公在選中命知曹州有兗人趙諫者交權勢結豪俠務乘人之弊以告許公奏之朝廷斬于都市乃下詔凡民非干已事無得告言遂著于令爲兩川安撫還除三司度支判官出守海陵新安二郡俄召試直史館出爲兩浙轉運使還判司農寺兼侍御史知雜事知越州任滿拜太常少卿判登聞檢院又得請權西京留司御史臺就拜祕書監遂分司洛下朝廷嘉其恬退遷太子賓客其子旣入臺閣迎侍于京師景祐元年卒年七十五贈禮部尙書子絳女適梅堯臣聖俞孫景初景溫公



始以文學中進士上第而子孫世踐其科又父子更直館殿  
出處僅二十餘年皆衣冠之盛事公分務洛下悉屏去外累  
於筆硯歌詩素所耽嗜亦不復爲曰佚我以老也數年間惟  
日看舊史一篇以代賓話一日因假寐夢中作讀史一絕云  
百年奇特幾張紙千古英雄一窖塵惟有炳然周孔教至今  
仁義治生民越一夕捐館范文正公爲紀其事

### 張子野吳江詩

張子野宰吳江日嘗賦詩云春後銀魚霜下鱸遠人曾到合  
思吳欲圖江色不上筆靜覓鳥聲深在蘆落日未昏聞市散  
青天都淨見山孤橋南水漲虹垂影清夜燈光合太湖爲當  
時之絕唱

### 春申君

姑蘇城隍廟神乃春申君也按史記春申君初相楚後請封  
於江東考烈王許之因城故吳墟以爲都邑吳地志亦云春  
申君嘗造蛇門以禦越軍其廟食於此也固宜

君於吳其說又似不同  
要當以史記之言爲正

越絕書云吳  
伐楚封春申

### 蔣密學

蔣堂字希魯嘗兩守此郡後旣謝事因家焉自號曰遂翁所  
居曰靈芝坊作園曰隱圃隱圃之內如巖扃水月庵煙蘿亭  
風篁亭香巖峰皆極登臨之勝公喜賓客日爲宴會時以詩  
篇爲樂范貫之龍圖嘗賦詩云勇退人難事明公識慮長波  
濤濟舟楫霜雪見松篁林下開前圃花間撤亞槍二疏良宴



會老杜好篇章道向清來勝機於靜處忘當除印如斗試一較閒忙

### 丁晉公拜老郁先生

祥符中丁晉公自參知政事拜平江軍節度使知昇州時建節鉞者出入必陳其儀度既還本鎮鄉人爲之改觀公在童齒時嘗從老郁先生學先生居光盪巷師孟之父戶部師淳之伯父子嘗從師孟之學至是首入陋巷詣先生之居以兩朱衣掖之拜于其下先生惶懼大聲呼之曰拜殺老夫矣既坐話舊極款密且云小年狹劣荷先生教誨痛加榘楚使某得成立者皆先生之賜也先生愈不自安不數月果卒公遣吏爲辦棺斂葬埋之物甚厚吳人至今以爲美談

### 李璋

李璋

志具字

居盤門內爲人不羈王荆公甚愛其才嘗有送行

詩云湖海聲名二十年尙隨鄉試已華顛卻歸甫里無三徑擬傍胥山就一廛朱轂風塵休悵望青鞋雲水且留連故人亦見如相問爲道方尋木雁篇又有公下第詩云浩蕩宮門白日開君王高拱試羣才學如吾子何憂失命屬天工不可猜意氣未宜輕感慨文章尤忌數悲哀男兒獨患無名爾將相誰云有種哉由此聲譽益著後以特恩補官孫益字彥中擢高科歷監察御史居常熟

公素好譏諛有一故相遠派在吳中嘗於游嬉之地書其壁曰大丞相再從妖某嘗遊公因題其旁曰混元皇帝三



十七代孫李璋繼至嘗赴特奏恩語同試者曰廷唱日必不以名見呼止稱某排第耳眾皆不以爲然厚與之約已而進狀云因在京師有遠族相遇譜系亦有以璋名者欲以玖易之它日殿下果唱李玖蓋公排第九也

### 木蘭堂詩

木蘭堂多爲太守遊燕之地范文正公作守時嘗賦詩云堂上列歌鐘多慚不如古却羨木蘭花曾見霓裳舞白樂天在

蘇嘗教倡人爲此舞也

堂之前後皆植木蘭榦極高大兵火後不存

### 林大卿買宅

州民有宅一區多出變怪無有售之者林顏大卿獨求買之既徙入中夜據廳事獨坐以示其不惑忽見一白衣婦人縱

其所如俄至一處所潛伏不見詰朝使人穿其地得銀百餘

錠其上皆鐫一林字此無異尉遲敬德事也

### 富祕監

富祕監嚴丞相忠文公之叔父也登大中祥符四年第慶歷中以刑部郎中守鄉郡嘉祐中守祕書監致仕退居于家未嘗一造府治終年無毫髮干請士大夫皆賢之皇朝類苑嘗載其事卒贈司徒葬寶華山有子臨娶先都官之女祕監與都官聘書今尚存飽學能文終池陽守鈞洵及元衡擢進士第皆祕監公之曾孫也

### 智積菩薩

靈巖寺乃智積開山之地智積當東晉末自西上來勅立伽



藍泗州僧仰持鉢江南至常之無錫聞智積在蘇卽問曰彼處已有人矣由此名遂顯有一貧嫗慕其行嘗持角黍爲獻智積受之嫗因得度至今上巳日號智積誕日聚數十百嫗爲角黍會

### 三江口

淞江之側有小聚落名三江口酈善長云淞江自湖東北逕七十里至江水分流謂之三江口吳越春秋云范蠡去越乘舟出三江之口入五湖之中皆謂此也三江卽禹貢所指者

### 楊惠之塑天王像

慧聚寺有毘沙門天王像形模如生乃唐楊惠之所作惠之初學畫見吳道子藝甚高遂更爲塑工亦能名天下徐稚山侍郎以此像得塑中三昧嘗紀其事謂其旁一侍女尤佳且戒後人不可妄加塗飾近爲一俗工修治遂失初意

### 王贄運使減租

初錢氏國除而田稅尙仍其舊畝稅三斗浙人苦之太宗乃遣王贄爲轉運使轉運衙舊在姑蘇州治之西偏均西浙雜稅贄悉令畝稅一斗使還大臣有責其增減賦額者贄謂畝稅一斗天下之通法兩浙旣已爲王民豈可復徇僞國之制上從其說浙人至今便之

### 鬪鴨

陸魯望有鬪鴨一欄頗極馴養一旦驛使過焉挾彈斃其尤者魯望曰此鴨善人言見欲附蘇州上進使者奈何斃之使



者盡以囊中金以望其口使徐問人語之狀魯望曰能自呼其名爾使人憤且笑拂袖上馬復召之還其金曰吾戲耳

中吳紀聞卷一

中吳紀聞卷一

姚氏三瑞堂

閶門之西有姚氏園亭頗足雅致姚名淳家世業儒東坡先生往來必憩焉姚氏素以孝稱所居有三瑞堂東坡嘗爲賦詩云君不見董召南隱居行義孝且慈天公亦恐無人知故令雞狗相哺兒又令韓老爲作詩爾來三百年名與淮水東南馳此人世不乏此事亦時有楓橋三瑞皆日見天意宛在虞鰥後惟有此詩非昔人君更往求無價手東坡未作此詩姚以千文遺之東坡答簡云惠及千文荷雅意之厚法書固人所共好而某方欲省緣除長物舊有者猶欲去之又况復收邪固卻而不受此詩旣作之後姚復致香爲惠東坡於虎



邱通老簡尾云姚君篤善好事其意極可嘉然不須以物見遺惠香八十罐却託還之已領其厚意與收留無異實爲它相識所惠皆不留故也切爲多致此懇予家藏三瑞堂石刻每讀至此則歎美東坡之清德誠不可及也

### 丁氏賢惠錄

丁氏賢惠錄安定先生文蘇子美書丁氏乃晉公之女弟陳君子之母也封長安縣君賢行甚著晉公鍾愛其甥欲官之丁氏固辭俾其以學術進晉公竦然稱歎已而同其弟維登進士科觀此足以知夫人之賢矣

里人張紳世與陳舊其婦媿而沒夫人保其嬰歸付乳媪親加拊視能言而還之相兄旣南謫家日淪困有妣孫女

幼孤夫人訓育篤於已生及歸馮氏子婦式閑淑甚宜家

其時工部黃郎中宗曰守蘇聞而謂人曰茲事可書于史

### 張文定公知崑山

張文定公方平景祐中宰崑山時蔣堂侍郎爲郡守得公著芻蕘論三十篇上之因舉爲賢良公知崑山時吳越歸國未甚久郡邑地曠民占田無紀歲遠多侵越訟數十年不能決公召問所輸租稅幾何大約百一二悉收其餘以賦貧民自是無訟

### 傳燈錄

永安禪院僧道元纂佛祖訖近世名僧禪語爲傳燈錄三十卷以獻祥符中詔翰林學士楊億知制誥李維太常丞王曙



刊定刻板宣布

曾大父

曾大父諱宗元字會之自幼穎悟絕人讀書於虎邱寺晝夜不絕舉進士爲鄉里首選繼登天聖五年第主杭州仁和簿時范文正公爲帥改容禮之曰公器業清修他日必爲令器謹勿因人以進曾大父敬服其訓高祖旣抱疾因乞便親移吳縣簿後以居憂服闋調建安尉藹有稱聲保任者二十有二章召見改大理寺丞知句容縣發摘奸伏政如神明葉道卿內翰時開府金陵甚爲之前席楊紘持使節行部號爲深酷吏望風投劾而去紘過境上獨不入縣或問其故紘曰龔君治民所至有聲吾往徒爲擾耳其見重如此自登朝未嘗

游公卿之門皆文正公之教也士論美之嘗通判衢越二州終都官員外郎葬南峰山有文集十卷號武邱居士遺藁子程孫況俱擢第曾大父善作詩嘗有六月吟云曦輪獵野枯杉松火焚泰華雲如峰天地爐中赤煙起江湖煦沫烹魚龍生瘴渴獸唇焦斷峻翻無聲落晴漢飢民逃生不逃熱血迸背皮流若汗玉宇清宮徹羅綺渴嚼冰壺森貝齒炎風隔斷眞珠簾池口金龍吐寒水象床珍簟凝流波瓊樓待月微酣歌王孫晝夜縱娛樂不知苦熱還如何夜宴詩云兔魄侵堦夜三刻蜀錦堆香花院窄風動簾旌玳瑁寒露垂蟲網珍珠白美人正席羅絃管綺幄雲屏爐麝暖只恐金壺漏水空不怕鸞觴琥珀滿勸君莫負秉燭游曾見古人傷晝短贈處士



林逋詩云高蹈遺塵蛻含華傲素園璜溪頻下釣蕙帳不驚  
猿養浩時清肅忘機只寓言幾回生蝶翅明月在西軒送陳  
君子之四明詩云短亭祖帳接平川柳拂回波繫畫船漸向  
落暉分繡袖忍聽離曲怨鷓絃雲連稽嶺應懷古路近花源  
好訪仙那更憑高望天際江堤烟重草綿綿搗砧詞云星游  
耿耿寒煙浮白龍銜月臨霜樓誰家砧弄細腰杵一聲搗破  
江城秋雙桐老翠墮金井高低冷逐西風緊靜如秋籟暗穿  
雲天半驚鴻斷斜影哀音散落愁人耳何處離情充喚起長  
信宮中葉滿堦洞庭湖上波平水萬里征夫眠未成搖風搗  
月何丁丁楚關秦嶺有歸客一枕夜長無限情曾大父嘗以  
所業擬范文正文正曰子之文溫厚和平而不乏正氣似其

爲人也世以爲確論云

### 婁侯

崑山乃古之婁縣今縣之東北三里有一聚落尙以婁縣爲  
名或云在漢爲鏐後避錢王諱改今名予攷三國志張昭拜  
輔吳將軍封婁侯則縣之爲婁舊矣漢書云改於王莽時

### 滕章敏公

滕元發名甫避高魯王諱以字爲名更字達道九歲能賦詩  
敏捷過人范文正之父爲諸舅見而奇之教以爲文文正爲  
鄉郡而安定胡先生居於郡學公往從之門人以千數第其  
文常爲首舉進士試于廷宋景文公奇其文擢爲第三以聲  
韻不中程黜之其後八年復中第三通判湖州時孫威敏公



沔守錢塘一見曰後當爲賢將授以治劇守邊之要召試學士院判吏部南曹同修起居注知制誥知諫院王絢論宰相不押班爲跋扈上以問公公曰宰相固有罪然以爲跋扈則臣以爲欺天陷人矣知開封府還御史中丞抗論得失爲多出知秦州河朔地震壞城池廬舍命公爲安撫使還復知開封府除翰林學士出知鄆州移定州入覲力言新法之害至定虜人畏服上喜令再任詔曰寬嚴有體邊人安焉因作堂以安邊名之又上疏論新法徙青州留守南都知蒲鄧二州坐累知安州侍郎韓不旅殞於安五十年矣學士鄭獬安人也旣沒十年貧不克葬公皆葬之以言者復貶筠州已而爲湖州哲宗卽位徙蘇揚二州除龍圖閣直學士復知鄆州歲方饑乞淮南米二十萬石爲備全活五萬人徙真定河東除龍圖閣學士復知揚州未至而卒年七十一贈左銀青光祿大夫諡曰章敏葬陽山公屢領帥權條畫皆有方議者謂近世名將無及公者朝廷雖知公之深而終不大用每進小人必讒之公嘗上章自訟有曰樂羊無辜謗書滿篋卽墨何罪毀言日聞天下聞而悲之

### 滄浪亭

滄浪亭在郡學之東中吳軍節度使孫承祐之池館其後蘇子美得之爲錢不過四萬歐公詩所謂清風明月本無價可惜只賣四萬錢是也予家舊與章莊敏俱有其半今盡爲韓王所得矣



范文正公復姓

范文正公幼孤隨其母適朱氏因從其姓登第時姓名乃朱說也後請于朝始復舊姓表中改用鄭準一聯云志在投秦入境遂稱於張祿名非伯越乘舟偶效於陶朱范蠡范睢事在文正用之尤爲切當今集中不載

鄭宣徽

鄭戩字天休居阜橋天聖初登進士第嘗知開封府發謫奸伏都下肅然遷三司使知樞密院俄以資政殿學士知杭州移鎮長安有表曰聽嚴宸之鐘鼓未卜何晨植勁柏於雪霜更觀晚節上稱誦者數四謂左右曰戩氣質英豪朕欲用爲宰相故屢試於外也慶歷三年代范文正爲四路都招討元

昊畏其威再知長安蕃酋鄯將遮道臥轍不得行六年移并州尋拜宣徽使奉國軍節度使未幾薨贈太尉諡文肅葬橫山

五柳堂

五柳堂者胡公通直所作也其宅乃陸魯望舊址所謂臨頓里者是也公諱稷言字正思兵部侍郎則之妣少學古文於宋景文又嘗獻時議於范文正晚從安定先生之學皆蒙愛獎後以特奏名拜官調晉陵尉歷主郢縣簿山陰丞自度不能究其所施乃乞致仕陞朝之後仍賜緋衣銀魚公旣告老卽所居蔬圃鑿池種五柳以名其堂慕淵明之爲人賦詩者甚衆公自中年清修寡欲延納後進談論不少休日入後不



飲食率以爲常或與客夜坐久不過具湯一杯而已年八十餘而終江諫議公望爲志其墓子嶧

### 中隱堂三老

曾大父自都官員外郎分司南京謝事家居所居在大酒巷取白樂天大隱住朝市小隱入邱樊不如作中隱隱在留司間之詩建中隱堂與尚書屯田員外郎程適太子中允陳之奇相與從游日爲文酒之樂至於窮夜而忘其歸三公皆耆德碩儒致政於家吳人謂之三老

### 林氏儒學之盛

林氏本福清人徙居吳門有諱槩者嘗爲省試第一登載國史儒學傳其子曰希旦邵顏相繼俱登科級希爲樞密諡文節旦爲殿中侍御史邵爲顯謨閣直學士諡文肅顏爲光祿卿希之子虞中詞科旦之子處亦登第邵之子攄賜出身爲中書侍郎近世儒門之盛必推林氏云

### 國一禪師

國一禪師乃崑山圓明村朱氏子捨俗爲僧受業於景德寺法名道欽因游歷叢林遇有一道者語之云乘流而行遇徑而止既至雙徑遂借龍潭築庵其上卽開山之祖也事載塔銘云今薦巖寺之西有以羅漢名橋者蓋指國一云

### 葉少卿

葉參字少列嘗守此郡旣謝事因居焉其子清臣登禁從少列猶及見之范文正公嘗贈之詩云退也天之道東南事了



人風波拋舊路花月伴閒身湖外扁舟遠門中駟馬新心從今日泰家似昔時貧見子登西掖攜孫過北隣白雲高閣曙綠水後池春尊酒呼前輩爐香叩上真只應陰德在八十富精神共居第在天慶之東中有七檜堂內翰道卿嘗持本路漕節侍養道卿之子公乘又嘗守鄉郡搢紳榮之善卷寺丞乃內翰之孫長於詩與祠部叔父唱和甚多其姪主簿公娶叔祖四朝議之女

二游詩

吳之士有恩王府參軍徐修矩者守世書萬卷酣飲於其間至日晏忘飲食又有前涇縣尉任晦其居有深林曲沼危亭幽砌皮日休嘗游二君宅每為淡旬之款篇章留贈不一號

二游詩

安定先生

胡翼之本海陵人學者尊其道皆稱為安定先生景祐中范文正公薦先生白衣對崇政殿贈祕書省校書郎文正上疏請建郡學首以先生為吳興學官繼移此邦先生居學嚴條約以身先之雖大暑必公裳終日延見諸生以嚴師弟之禮解經有至要義愜愜為諸生論其所以治已而治乎人者學徒千數日月刮剗為文章皆傳經義必以理勝信其師說崇尚行實自後登科為大儒者累世不絕如滕章敏范忠宣錢丙翰淳老皆從先生之學者也至今學宮畫像而祠之

蘇子美飲酒

子美豪放飲酒無算在婦翁杜正獻家每夕觀書以一斗為



率正獻深以爲疑使子弟密察之聞讀漢書張子房傳至良與客俱擊秦皇帝誤中副車遽撫案曰惜乎擊之不中遂滿引一大勺又讀至良曰始自起下邳與上會於留此天以臣授陛下又撫案曰君臣相遇其難如此復舉一大勺正獻公知之大笑曰有如此下物一斗誠不爲多也

### 張伯玉郎中

張伯玉字公達嘗爲郡從事剛介有守文藝甚高范文正公深愛之嘗舉以應制科舉詞云張某天賦才敏學窮閭奧善言皇王之治博達古今之宜素蘊自沖清節自處堪充應賢良方正能直言極諫科其應詔也又作上都行送之果中高選伯玉在蘇日述作並見蓬萊集

### 上方詩

唐孟郊因其父爲崑山尉常至山中題詩於上方云昨日到上方片霞封石床錫杖莓苔青袈裟松柏香晴磬無短韻晝燈含永光有時乞鶴歸還放逍遙場其後張祐嘗游亦有詩云寶殿依山險凌虛勢欲吞畫簷齊木末香砌壓雲根遠景窗中岫孤烟竹裏村凭高聊一望歸思隔吳門皇祐中王荆公以舒倅被旨來相水事到邑已深夜艤舟寺之前秉火炬登山閱寺中之詩一夕和竟二公之詩詰旦卽回棹其詩云僧蹊蟠青蒼莓苔上秋牀霜翰飢更清風蕩遠亦香埽石出古色洗松納空光久游不忍還迫近冠蓋場峰嶺互出没江湖相吐吞園林浮海角臺殿擁山根百里見漁艇萬家藏水



村地偏來客少幽興祇桑門此四詩爲山中之絕唱

### 陳龍圖使高麗

陳睦字子雍嘉祐六年登進士科名在第二治平中詔舉館閣才行之士子雍與劉紋李常寧李清臣輩首被選擢熙寧元豐間高麗屢航海修貢朝廷以爲恭選使往諭之初命林希子中力辭更命睦睦卽日就道神宗大喜語輔臣曰林希無親堅辭不行陳睦親在乃不憚於往因出希知池州假睦起居舍人直昭文館特賜黃金帶受命七日而行涉海踰月出入驚濤中遂抵其國使還乃真拜所假官職且令服所賜金帶又賜金蓋於令式外以爲寵俄直龍圖閣知潭州卒墓在南峰山二子彥文經仲嘗躋法從彥武緯叔爲提舉官

初林希樞密買卜於京師孟詵爲作卦影畫紫袍金帶人對大水而哭林以高麗之役涉瀚海故力辭之後出知池州繼遭喪禍其驗不在彼而在此始知禍福不可避也

### 朱樂圃先生

朱長文字伯原未冠擢進士第英聲振于士林元祐初充本州教授入朝除祕書省正字樞密院編修官後以疾解任退居于家所居在雍熙寺之西號樂圃坊地有高岡清池喬松壽檜先生以志不得達棲隱于中潛心古道篤意著述人莫敢稱其姓氏但曰樂圃先生樂圃在錢氏時號金谷方子通嘗有詩云與門此圃號金谷主人瀟灑能文章子通又嘗著樂圃十詠一曰樂圃二曰遂經堂三曰琴臺四曰墨池五曰



魚溪六曰詠齋七曰灌園亭八曰見山岡九曰峨冠石十曰  
列泉井常公安民常造先生隱居愛其趣識志尙灑然有異  
於人而惜其遺逸沈晦因觀所著續圖經遂作序以紀之

### 海湧山

虎邱舊名海湧山闔閭王旣葬之後金精之氣化爲虎踞其  
墳故號虎邱山椒有二伽藍列爲東西白樂天有東武邱西  
武邱詩顏魯公亦云不到東西寺於今五十春今之西庵所  
謂西武邱也虎邱避唐諱改曰武

### 盧通議

盧革字仲華本德清人少奇穎舉神童年十六擢進士乙科  
慶歷間知冀州時蠻人入寇桂管公經畫軍需以應辦聞歷

婺泉二州除廣南提點刑獄福建湖南兩轉運使力請郡以  
自效神宗嘉之顧執政曰盧革恬退如此可與一佳郡遂除  
宣州未幾告老遷光祿卿致仕以子貴進祕書監太子賓客  
官制行改太中大夫哲宗踐阼遷通議大夫退居于吳十五  
年年八十一卒子秉今盧提刑橋卽公所居之地也先殿院  
旣以散秩養病日與賓客酌酒賦詩自娛公誠慤莊重有前  
輩之風先殿院雅好其爲人朝夕與之議論公性不甚飲每  
勸之酒至三分則起而拱手曰已三分矣至五分則曰已五  
分矣其他率以是應之旣去先殿院審執事者皆曰客之言  
毫髮不妄由是益器重之

### 閭門樓詩



閭門舊有樓三間于猶及見之陸機吳趨行云閭門何峨峨  
飛閣跨通波重欒承游極回軒啓曲柯蘇子美詩云年華冉  
冉催人老雲物瀟瀟又變秋家在鳳凰城下住江山何事苦  
相留更建炎兵火不復存矣

### 章守子用皂蓋

元豐中章岷之弟朝議爲郡守剛介不可屈人目之曰章硬  
頸其子出入用皂絹蓋肩輿不過二人

### 隨緣居士

黃策字子虛彥之子中進士乙科爲雍邱縣主簿元符末詔  
許中外言事時昭慈旣復位號典冊有未盡正者因上書引  
古義力爭之崇寧初黨論起名人黨籍羈置登州會赦還鄉

里遂休官號隨緣居士欽廟嘗書隨緣二字賜之藏宸翰於

家著隨緣居士記書之於壁建炎中追錄黨人除直祕閣無公

疾端坐而逝葬光福山自題其墓曰隨緣居士之塔云

### 石點頭

今虎邱千人坐旁有石點頭十道四蕃志云生公異僧竺道  
生也講經於此無信之者乃聚石爲徒與談至理石皆爲點  
頭

### 軌革卦影

韓中孚字應天將游上庠聞市肆有精軌革術者應天筮之  
畫一金章紫綬人有青色瓶在其旁復有一人處圓圈中術  
士謂之曰君此行未必到闕中途必爲貴人所留應天未之



信行次南徐適朱行中龍圖為郡守與之厚善聞其來倒屣  
迎之延於郡圃朱平生愛一賁色酒壺因宴出示之圃中有  
草庵其狀甚圓應天寢於其間與卦影所畫無一不驗以此  
知不惟飲啄前定雖受用之物寢處之地亦非偶然者賁色一作

祕色

### 夢石天王像

後唐時慧聚寺有紹明律師僧中傑出者居半山彌勒閣一  
夕夢神人曰簷前古桐下有石天王像與銅鐘師宜知之詰  
旦掘其地果獲此二物今尚龕置壁間形製極古故前輩有  
詩云一日石像欲發現光垂景夢鳴高岡常熟破山恩高僧  
嘗學于紹明見本朝僧史

### 改正洪範

余燾字元輔方舍法欲行上書引成周事力贊之因命以官  
累遷至正郎後復上書改洪範篇自王省惟歲月之從星則  
以風雨乃屬之四五紀一曰歲二曰月三曰日四曰星辰五  
曰歷數之下謂之九疇皆有衍文惟四五紀無之至於八庶  
徵之後既言肅時雨若止蒙常風若意已斷矣而又加王省  
惟歲已下之文則近於贅或者是其說然為臺諫所彈不果  
施行

### 范文正四子

文正四子純佑字天成純仁字堯夫純禮字彝叟純粹字德  
孺長子少有大志惜乎享壽不遐終軍器簿堯夫位丞相彝



雙爲右丞德孺亦躋法從平時文正喜收接名士如孫明復  
胡安定之徒皆出其門朝夕與其子弟講論道德故賢行成  
於所習云

### 林酒仙

國初時長洲縣東禪寺有僧曰遇賢姓林氏以其飲酒無算  
且多靈異故鄉人謂之林酒仙口中可容兩拳嘗醉於酒家  
每出羣聚而觀之者不絕能自圖其形無毫釐不相似好賦  
詩雖多俗語中含理致然亦有清婉者如云楊子江頭浪最  
深行人到此盡沈吟它時若向無波處還似有波時用心門  
前綠樹無啼鳥庭下蒼苔有落花聊與東風論箇事十分春  
色屬誰家心閑增道氣忍事敵災屯謹言終少禍節儉勝求  
人若此之類皆名言也真身塑寺中

### 章岷

章岷字伯鎮嘗爲平江軍推官文聲甚著與曾大父同登天  
聖五年第情好極密高祖殿院墓銘乃其所作也范文正公  
有和章岷從事鬪茶歌及同登承天寺竹閣詩

### 鮓魚

鮓廣韻吾灰切魚名似鮓集韻吾回切魚名鯉之小者魚出吳中其狀似鮓隋大業中  
吳郡嘗獻海鮓魚乾膾四缶遂以分賜達官皮日休詩云因  
逢二老如相問正滯江南爲鮓魚

### 徐都官九老會

徐祐字受天擢進士第爲吏以清白著聲慶歷中屏居於吳



日涉園廬以自適時葉公參亦退老于家同為九老會晏元  
獻杜正獻皆寓詩以高其趣晏之首題云買得梧宮數畝秋  
便追黃綺作朋儔杜之卒章云如何九老人猶少應許東歸  
伴醉吟時與會者纔五人故杜詩及之享年七十有五終都

官員外郎

子仲謀屢把麾持節女適樞密直學士施昌言

中吳紀聞卷二

中吳紀聞卷二

葉道卿

葉清臣字道卿少列之子天聖二年劉筠知貢舉得公所對  
策奇之擢為第一國朝以來以策擢高第自清臣始寶元中  
為兩浙轉運使康定初知制誥慶歷初出知江寧府召入為  
翰林學士俄丁父憂有詔起復為邊帥力辭不行免喪知邠  
州改知澶州又改青州永興軍皇祐初復召入為三司使帝  
嘗訪以禦邊之策公對曰陛下御天下二十八年未嘗一日  
自暇逸而叛羌黠虜頻年為患詔問輔翼之能方面之才與  
夫帥領偏裨當今孰可以任此者臣以為不患無人患有  
而不能用人爾今輔翊之臣抱忠義之深者莫如富弼為社稷



之固者莫如范仲淹諳古今政事者莫如夏竦議論之敏莫如鄭戩方面人才嚴重有紀律者莫如韓琦臨大事能斷者莫如田況剛果無顧避者莫如劉渙宏遠有方略者莫如孫沔至於帥領偏裨貴能坐運籌策不必親當矢石王德用素有威名范仲淹深練軍政龐籍久經邊任皆其選也狄青范全頗能馭衆蔣偕沈毅有術略張亢倜儻有膽勇劉貽孫材武剛斷王德基純慤勁勇此可補偏裨者也上用其言皆見信任未幾出守河陽卒公識度奇拔議論出人意外表其立朝也數以忠言鯁論啓沃上心而媚忌者衆竟不果大用范文正公嘗爲文祭之云濬學偉文發於妙齡天然清流不雜涇涇又云高節莫屈直言屢諍朝廷風采搢紳輝映天子知人期以輔政弗諧而去能不曰命數語盡之矣

### 觀風樓

子城之西舊建樓其上名觀風范文正公作守時嘗賦詩云高壓郡西城觀風不浪名山川千里色語笑萬家聲碧寺煙中靜紅橋柳際明登臨豈劉白滿目是詩情在唐但謂之西樓白樂天有西樓命宴詩後改爲觀風今復名西樓矣

### 三高亭

越上將軍范蠡江東步兵張翰贈右補闕陸龜家各有畫像在吳江鱸鄉亭旁東坡先生嘗有吳江三賢畫像詩後易其名曰三高且更爲塑像耀庵主人王文孺獻其地雪灘因遷之今在長橋之北與垂虹亭相望石湖居士爲之記



程光祿

程師孟字公闢所居在南園之側號書錦坊自高祖思爲錢氏營田使因徙姑蘇擢景祐元年進士第知吉水錢塘二縣皆有政聲後通判桂州慶歷中詔近侍二十八各舉所知於是柳植施昌言薦公可任除知南康軍又知楚遂二州提點夔路刑獄屬歲大饑公行部以常平粟賑民猶不足卽奏發倉以濟之吏勸須報公曰本道至都五千里報至則民殍矣遂活飢民四十餘萬擢提點河東路刑獄岢嵐等郡無常平粟邊民飢或竄蕃境公得請出祠部牒募民納粟置廩以備荒歲汾晉之旁山谷之水可以灌田公爲醜渠續通泉源所溉者無慮萬頃召拜三司度支判官居一歲知洪州興利除

害一方甚賴之英宗卽位召判三司都磨勘司委公商度河北四榷場利害公請減物直償闕欠以來北賈使還除利州路轉運使江南西路轉運使始江西茶禁旣通賦民納茶租謂之白紉錢民甚患之公奏令鬻茶者計斤輸秤頭錢代其數以寬民力至熙寧中以公之請頒下諸路俄傳交趾爲寇遂以公直昭文館知福州一新學宮禮先生賢士以厚教育之意鐵錢亂幣公爲罷之餼疾救荒蘇息以萬計閩中父老有云自國朝守吾郡者謝諫議泌以惠愛著蔡端明襄以威名顯兼之者惟公而已移知廣州廣控蠻粵而無蕃垣扞禦之備公至特作西城廣踰十二里由是廣人有自安之計大修學校日引諸生講解負笈而來者相踵諸蕃子弟皆願入



學秩滿除右諫議大夫再任公治廣六年威愛並行上遣中使撫問召判三班院遷給事中充集賢殿修撰判都水監改判將作監出知越州公至越寬猛適中而事自治民皆愛之又逾於洪福廣也官制行換太中大夫青社闕帥以通議大夫充京東安撫使尋年政成上疏告老遷正議大夫致仕哲宗卽位授光祿大夫卒年七十八葬橫山公強敏精察出於天性凡臨治五大鎮斷正滯訟辨活疑罪蓋不可勝計所至之地囹圄空虛道不拾遺旣去民爲立祠刊石頌德樂圃先生少許可至言公政事則曰雖韋丹治豫章孔幾帥嶺南常衮化石閩無以加也故天下以爲才臣吏師有詩集二十卷奏議十五卷

### 丁晉公飯僧疏

丁晉公南遷日夢南嶽懶瓚禪師遂捨白金一笏飯僧于潭州自製齋疏云右伏以佛垂徧智道育羣情凡欲拯於傾危必豫形於景貺某白衣干祿叨冢宰之重權丹陛宣恩忝先皇之優渥補仲山之衮雖曲盡於寸心和傳說之美實難調於衆口嘗於安寢忽夢清容妙訓洽洽俾塵心而早悟真儀隱隱恨凡目以何知蓋以智未周身事乖遠慮旣禍臨而不測誠災及以非常出向西京感聖恩而寬宥竄於南裔當罔憲以甘心咎實自貽孽非他作念一家而散地思萬里以何歸旣爲負國之臣永廢經邦之術程游湘土道假堊山正當煩惱之身忽接清閑之衆方知富貴難保始終真饒鼎食之



榮豈若孟美之美持形歸命恭發精誠捐施白金充羞淨供  
仰苾芻之高德報懶瓚之深慈冀保此行乞無他患惟願天  
回南瞻澤賜下臨免致邊夷白日便同於鬼趣賜歸中夏黃  
泉亦感於君恩虔罄丹誠永繫法力卑情不任激切之至

山之哀雖曲盡於寸心今多作巧心後人見晉公以智巧敗  
又改云惟其曲盡於巧心是以難調於眾口不知以巧對眾

未如寸  
字為切

### 蔡君謨題壁

張子野宰吳江因如歸舊亭撤而新之蔡君謨題壁間云蘇  
州吳江之瀕有亭曰如歸者隘壞不可居康定元年冬十月  
知縣事祕書丞張先治而大之以稱其名之謂既成記工作  
之始以示于後

### 郝正夫

郝亶字正夫太倉人起於農家自幼知讀書識度不類凡子  
年甫冠登嘉祐二年進士第崑山自國朝以來無登第者正  
夫獨破天荒後往金陵遣其子僑就學於王荆公嘗有贊見  
詩云十里松陰蔣子山暮烟收盡梵宮寬夜深更向紫微宿  
坐久始知凡骨寒一派石泉流沆漑數庭霜竹顛琅玕大鵬  
汎有搏風便還許鷓鷯附羽翰荆公一見奇之今集中有謝  
郝亶祕校見訪於鍾山詩云誤有聲名只自慙煩君跋馬過  
茅簷已知原憲貧非病更許莊周智養恬世事何時逢坦蕩  
人情隨分就猜嫌誰能胸臆無塵滓使我相從人未厭自此  
聲價頗重熙寧中為司農寺丞上書言水利朝廷以其功大



中吳紀聞卷三  
五  
役重頗難之正夫條水之利害著成一書今刊行於世未幾復司農寺丞除江東運判元祐初入爲太府寺丞出知温州以比部郎中召未至而卒年六十有六葬於太倉孫升卿登第守徽常二州

公初授睦州團練推官知杭州於潛縣未赴以水利役法鹽銅酒五利獻諸朝丞相王文公安石奇之除司農寺丞旋出提舉兩浙水利議者以其說非便遂罷免己而歸治所居之西積水田曰大泗灑者如所獻之說爲圩岸溝洫井舍場圃俱用井田之遺制於是歲入甚厚卽圖其狀以獻且以明前日之法非苟然者復召爲司農寺主簿稍遷丞預修司農寺敕式頗號完密除江東路轉運判官

陳君子父殿丞

殿中丞陳質德行著於鄉里其死也范文正公挽之云賢者逝如此皇天豈易知衆人皆墮淚君子獨安碑幾世傳清白滿鄉稱孝慈賢哉生令嗣遺秀在蘭芝公有二子曰郢曰之奇皆爲吳中高士

鬱林石

陸龜蒙居臨頓里其門有巨石遠祖績嘗仕吳爲鬱林太守罷歸無裝舟輕不可越海取石爲重人稱其廉號鬱林石

謝希深

謝絳字希深太子賓客濤之子大中祥符八年登進士甲科楊又公薦其才召試館職充祕閣校理景祐元年丁父憂服



除召試知制誥歐陽文忠公嘗云三代以來文章盛者稱西漢公於制誥尤得其體常楊元白不足多也寶元初知鄧州卒年四十有五公自少而仕凡五十年間自守不回而外亦不甚異一時賢士大夫無不敬之子景初景溫皆爲時名儒

### 范文正公還鄉

文正公自政府出歸鄉焚黃未至近邑先投遠狀或以爲太過公曰維桑與梓必恭敬止敢不盡禮乎旣至搜外庫惟有絹三千疋令掌吏錄親戚及閭里知舊自大及小散之皆盡曰宗族鄉黨見我生長幼學壯仕爲我助喜我何以報之又買負郭常稔之田千畝號曰義田以濟養羣族擇族之長而賢者一人主之其計日食八米一升歲衣人二緜嫁女者錢五十千娶婦二十千再嫁者二十千再娶者十五千葬者如再嫁者之數葬幼者十千族之聚者九十口歲入粳稻八百斛以其所入給其聚仕而家居俟代者預焉仕而之官者罷其給公雖沒後世子孫修其業承其志如公存也

### 清遠道士詩

清遠道士同沈恭子游虎邱寺詩云我本長殷周遭罹歷秦漢四瀆與五嶽名山盡幽竄及此寰區中始有近峰翫近峰何鬱鬱平湖渺瀰漫吟挽川之陰步上山之岸山川共澄澈光彩交零亂白雲翁欲歸青松忽消半客去川島靜人來山鳥散谷深中見日崖幽曉非日聞子盛游遨風流足詞翰嘉茲好松石一言常累歎勿謂予鬼神忻君共幽讚清遠道士



竟不知其爲何人以鬼神自謂亦怪之甚者顏魯公李德裕皮日休陸龜蒙皆有和篇沈恭子亦莫詳其因詩中有風流詞翰之稱必神怪之儔也

### 幽獨君詩

唐時虎邱石壁隱出幽獨君詩二首其一云幽明雖異路平昔忝工文欲知潛寐處山北有孤墳其二云高松多悲風瀟瀟清且哀南山接幽壟幽壟空崔巍白日徒昭昭不照長夜臺雖知生者樂魂魄安能迴況復念所親慟哭心肝摧慟哭更何言哀哉復哀哉其辭甚奇愴後人又有賦答幽獨君一詩不知誰氏所作

### 本禪師

宗本圓照禪師乃福昌一飯頭

福昌承天寺子院

懵無所知每飯熟

必禮數十拜然後持以供僧一日忽大悟恣口之所言皆經中語自此見道甚明後住靈巖近山之人遇夜則面其寢室拜之侍僧以告遂置大士像於前人有飯僧者必告之曰汝先養父母次辦官租如欲供僧以有餘及之徒衆在此豈無望檀那之施須先爲其大者其它率以是勸人仁宗嘗召至京師賜金襴衣加圓照師號後復歸本山

舊傳大本至京師有一貴戚欲試之因以猾倡薦寢本登榻鼻息如雷其倡爲般若光所爍通夕不寐翌旦炷香拜之曰不意今日得見古佛

### 吳王拜郊臺



吳王拜郊臺在橫山之上今遺跡尚存春秋時王政不綱以諸侯而爲郊天之舉僭禮亦甚矣

### 范貫之

范師道字貫之文正公之姪登天聖八年甲科嘗知廣德縣有治狀孫甫之翰薦之通判許州至和元年吳育春卿薦公召拜侍御史公之少也有經天下之志其長也遇事未嘗屈及爲上耳目早夜思所以稱職者始見上願擇賢相以久其任旣而論奏二府與近侍不法事上多用其言俄出知常州御史府極言其不平宰相亦以是罷去而公之名迹愈聞天下移廣東路轉運使又移兩浙未幾拜起居舍人同知諫院嘉祐四年百官上尊號公獨諫以爲無益於治體而有損聖

主謙尊之德至言諸閣女御例遷因災異以明天意上皆深然之兼遷侍御史知雜事會大臣居機宥者無遠謀繼而進者不復協時論公論列甚切上雖納其奏然用是出知福州召爲三司鹽鐵副使嘉祐八年以疾請郡除戶部郎中直龍圖閣下車未久卒年五十有九公出入臺諫凡九載朝廷之事聞無不言言必欲行如擇宗室以備問安之職請士大夫終葬始得從仕限民田以均民產抑貪墨以清守令止內降以杜漸立私廟以廣孝擇知典故近臣以任太常禮樂之官減色役以恤民力之困皆天下之急務而衆所願行者有奏議二十卷文集五十卷嘗爲唐史著君臣治忽之迹命藏祕閣有詔褒美子在京世亮皆舉進士第所居在承天寺前號



豸冠坊葬天平山趙清獻公志其墓

### 南翔寺

崑山縣臨江鄉有南翔寺初寺基出片石方徑丈餘常有二白鶴飛集其上人皆以爲異有僧號齊法師者謂此地可立伽藍卽鳩財募衆不日而成因聚其徒居焉二鶴之飛或自東來必有東人施其財自西來則施者亦自西至其它皆隨方而應無一不驗久之鶴去不返僧號泣甚切忽於石上得一詩曰白鶴南翔去不歸惟留真跡在名基可憐後代空王子不絕薰修享二時因名其寺曰南翔寺之西又有村名白鶴

### 張敏叔

張景修字敏叔人物瀟灑文章雅純登治平四年進士第雖兩爲憲漕五領郡待其家極貧窶僦市屋以居嘗有絕句云茅簷月有千金稅稻飯年無一粒租生事蕭條人問我水芭蕉與石菖蒲觀其詩大抵多清淡嘗題集清軒詩云洗竹放教風自在傍溪看得月分明又多好用俗語如得五品服詩云白快近來逢素鬢赤窮今日得朱袍又謝人惠油衣云何妨包裹如風藥且免淋漓似水雞蓋以文滑稽也舊嘗作古風送宋天錫童子云黃金滿籩富有餘一經教子金不如君家有兒不肯娛口誦七經隨卷舒渥洼從來產龍駒鸞鷲乃是真鳳雛一朝過我父子俱自稱窮苦世爲儒雪窗夜映孫康書春隴晝荷兒寬鋤翻然西入天子都出門慷慨曳長裾



神童之科今有無談經射策皆壯夫古來取士凡數塗但願  
 一一令吹竽甘羅相秦理不誣世人看取掌中珠折腰未便  
 賦歸歟待君釋褐還鄉閭初景修為汝州梁令作此詩天錫  
 既到闕忘取本州公據為禮部所却因擊登聞鼓繳景修詩  
 為證神宗一見大稱賞之翌日以語宰相王珪而恨四方有  
 遺材即令召對珪言不欲以一詩召人恐長浮競不若俟其  
 秩滿然後擢用之遂止令中書籍記姓名比罷官而神宗已  
 升遐矣景修歷事三朝每登對上必問聞卿作朱童子詩試  
 為舉似由此詩名益著終祠部郎中年七十餘卒平生所作  
 詩幾千篇號張祠部集子漢之漢之嘗宰崑山頗緩於索租  
 邑人戲云渠家自來無此故  
不與人索也敏叔有花客  
 詩十一章 梁縣屬汝州

### 崑山夫子廟

唐制郡邑皆得置夫子廟自黃巢之亂存者無幾崑山之廟  
 更五代五六十年不建自本朝太平興國二年錢氏納土請  
 吏朝廷始除守以治之至雍熙初徵事郎邊佐首為崑山宰  
 因其遺址立夫子廟門闕甚麗狀十哲像於其旁王元之為  
 作記景祐初范文正請立郡庠於是縣亦有學矣

### 孫子和

孫冲字子和登熙寧六年進士第少負才名為荆公之客嘗  
 著鄉黨傳說一論荆公甚奇之後宰和之含山號為循吏律  
 已甚正一毫無妄取秩滿率家人解其歸裝老獲有蓄一砧  
 者子和視之曰非吾來時物也命還之其它大率類此鴨章



交上改宣德郎未幾卒于京師年三十有五無子以族姪峻  
爲嗣峻嘗倅江州終朝請大夫

子和妻子之姑氏又與叔祖朝議爲同年叔祖嘗以詩挽  
之云結髮欣同籍聯姻喜素風期君千里逸耀我一枝窮  
新命拖紳後殘編旅筭中空餘循吏傳紀次在元豐

### 張翰

東晉張翰吳人仕齊王罔不樂居其官一日在京師見秋風  
忽起因作歌曰秋風起兮佳景時吳江水兮鱸正肥三千里  
兮家未歸恨難得兮仰天悲遂棄官而還國初王贄運使過  
吳江有詩云吳江秋水灌平湖水濶烟深恨有餘因想季鷹  
當日事歸來未必爲葦鱸贄之意謂翰度時不可有爲故飄  
然遠去實非爲鱸也至東坡二賢詩則曰浮世功名食與眠  
季鷹真得水中仙不須更說知幾早只爲葦魚也自賢其說  
又高一著矣

### 皮日休

皮日休字襲美唐咸通十年爲郡從事居官纔一月陸魯望  
以所業見之自此交從甚密更迭唱和無慮數百篇總目之  
曰松陵集松陵吳江別名也日休自有著述號鹿門子書

### 橋名

城中有橋梁三百六十所每橋刻名於旁者始於郡守韓子  
文度支兵火後間有缺者

福昌長老正橋頗具眼禪林多宗之一日升座有問話者



云蘇州三百六十座橋那座是正橋答云度驢度馬

### 賀方回

賀鑄字方回本山陰人徙姑蘇之醋坊橋方回嘗遊定力寺訪僧不遇因題一絕云破冰泉脉漱籬根壞衲猶疑掛樹猿蠟屐舊痕渾不見東風先爲我開門王荆公極愛之自此聲價愈重有小築在盤門之南十餘里地名橫塘方回往來其間嘗作青玉案詞云淩波不過橫塘路但目送芳塵去錦瑟華筵誰與度月橋仙館綺窗朱戶唯有春知處碧雲冉冉衡臯暮綵筆新題斷腸句試問閒愁知幾許一川烟草滿城風絮梅子黃時雨後山谷有詩云解道江南腸斷句只今唯有賀方回其爲前輩推重如此初方回爲武弁李邦直爲執政力薦之其略謂切見西頭供奉官賀某老於爲學泛觀古今詞章辯道議論迥出流輩欲望改換合入文資以示聖時育材進善之意上可其奏因易文階積官至正郎終於常俸

### 白公檜

白樂天爲守時恩信及民皆敬而愛之嘗植檜數本於郡圃後人目之爲白公檜以況甘棠焉

### 癸甲先生

潘勻字叔治登進士第爲吳興郡都掾後絕意祿仕徧遊天下佳山水嘗爲雁蕩百詠其末云都爲畫工圖不得一時收拾作詩歸自號癸甲先生或問其故曰始終之義也後果以癸日亡甲日歿



方子通

方惟深字子通本莆田人其父屯田公葬長洲縣因家焉最長於詩嘗過黟淡灘題一絕云溪流怪石礙通津一一操舟若有神自是世間無妙手古來何事不由人王荆公見之大喜欲收致門下蓋荆公欲行新法沮之者多子通之詩適有契於心故爲其所喜也後子通以詩集呈荆公侑以詩云年來身計欲何爲跌宕無成一軸詩懶把行藏問詹尹願將生死遇秦醫丹青效虎留心拙斤匠良工入手遲此日知音堪屬意枯桐正在半焦時凡有所作荆公讀之必稱善謂深得唐人句法嘗遺以書曰君詩精純警絕雖元白皮陸有不可及子通遊王氏之門極蒙愛重初無一毫迎合意後以特奏名授興化軍助教隱城東故廬與樂圃先生皆爲一時所高每部使者及守帥下車必卽其廬而見之前後上章論薦者甚衆子通竟無祿仕意其於生死禍福之理莫不超達嘗造一園亭不遇主人自盤礴終日因題於壁間云何年突兀庭前石昔日何人種松柏乘興閒來就榻眠一枕春風君莫惜城西今古陽山色城中誰有千年宅來往何必見主人主人自是亭中客其灑落類如此仲殊一日訪子通有絕句云多年不見玉川翁今日相逢小榭東依舊清涼無長物只餘松檜養秋風可見其清高矣年八十三而卒有詩集行於世無子一女適樂圃先生之子發

破山詩



常建詩云竹逕通幽處禪房花木深山光悅鳥性潭影空人心題常熟破山也舊傳有四高僧講經山中一老翁日來聽法久之問翁所從來答曰吾非人也龍也因問本相可得見乎曰可已而果以全體見僧恐甚亟誦揭諦咒語揭諦神與龍角力龍不能勝破其山而去續圖經所載不同謂白龍與一龍鬪未知孰是

### 甫里

甫里在長洲縣東南五十里乃江湖散人陸龜蒙字魯望躬耕之地散人廟食於此一方之人至今想其高風常誇示於四方以爲榮焉唐書云散人乃唐相陸元方七世孫又自號天隨子著笠澤叢書若干卷

### 有脚書厨

叔祖諱程字信民剛正自守不惑於禍福嘗憤聖道不明欲排異端之學家不置釋老像祭祀未嘗焚紙錢儒家甚宗之自幼讀書於南峰山先都官墓廬攻苦食淡手未嘗釋卷記問精確經傳子史無不通貫鄉人號爲有脚書厨嘗題一絕於壁間云月度疎櫺起更慵坐聽澄照五更鐘却思湖上西興急風送山前萬箇松登熙寧六年進士第歷西安丞桐廬令子況旣登郎省贈左朝議大夫

### 秦娘

秦娘吳之美婦人也劉禹錫詩云有時粧成好天氣走上皇橋折花戲風流太守韋尚書路旁忽見停車旟



南園詩

南園乃廣陵王舊圃中有流盃旋螺亭亞於滄浪之景王黃州爲長洲時無日不攜客醉飲嘗賦詩云他年我若功成後乞取南園作醉鄉今園中大堂遂以醉鄉名之大觀末蔡京罷相欲東還詔以其園賜之京卽以詩贈親黨云八年帷幄竟何爲更賜南園寵太師堪笑當時王學士功名未有便吟詩黃州之詩不過寓意耳京遽以無功名誚之黃州雖終爲黜臣其名與天地同不朽京居相位二十年又處師垣之尊至今雖三尺之童唾罵不已其賢不肖何如也

朱子奢

朱子奢蘇州人太宗時爲宏文館學士帝嘗詔起居記錄臧否朕欲見之子奢曰陛下舉無過事雖見無嫌然以此開後世史官之禍可懼也帝深納之見唐書儒學傳

錢氏納土

太平興國三年陳洪進奉表獻漳泉兩郡詔授洪進武寧軍節度使留京師奉朝請是歲錢忠懿王倣上表獻十三州之地錢氏納土蓋在陳氏之後或說以爲興國二年非也

白馬澗

南峰山北有聚落號白馬澗昔支遁騎白馬而來飲於澗中因以名焉山之顛有石埧然號馬跡石又有一石室號支遁庵乃其修習之地也

禪月大師



中吳紀聞卷三  
萬壽寺有禪月閣禪月者唐僧貫休也生於婺之蘭溪自祝髮爲僧徧參名德又善作詩文有西嶽集行於世性好圖畫古佛嘗自夢得十五羅漢梵相旣而尙缺其一未能就夢中復有告之曰師之相乃是遂如所告因照水以足之今其畫尙傳旣至吳寓跡萬壽甚久後入蜀死葬于成都平生行業具載白蓮塔銘

中吳紀聞卷三

中吳紀聞卷四

太公辟地處

常熟海隅山有石空十所昔太公辟紂居之孟子謂太公辟紂居東海之濱者此也常熟去東海正六十里故謂之海濱楊備郎中嘗作詩紀其事

范忠宣公

范純仁字堯夫爲人寬厚長者文正嘗使至鄉還至京口見石曼卿數喪未舉盡以麥舟與之蘇黃門稱其爲佛地位中人觀此亦可以見矣元祐初自慶帥召爲給事中遂執政柄未幾拜右僕射凜然有父風烈爲宰相一年出知潁昌府旣而復入相坐元祐黨散官安置元符三年徽宗卽位復欲召



為相尋卽下世遺表有云蓋嘗先天下而憂期不負聖人之學此先臣所以教子而微臣所以事君後御題其墓碑云世濟忠直之碑子正平字子夷正思字子默學行亦為士林所稱

滕章敏公結客詩

滕章敏慷慨豪邁不拘小節少嗜酒浮湛里市與鄭獬毅夫為忘形友議論風采照映一世嘗與毅夫及楊繪元素同試京師自謂必魁天下與二公約若其言不驗當厚致其罰已而鄭居榜首楊次之公在第三二公責所約之金答曰一人解一人會吾安得不居第三俱一笑而散公平生不妄交遊嘗作結客詩云結客結英豪休同兒女曹黃金裝背鐵猛獸畫旂旄北閣芒星落中原王氣高終令賀蘭賊不著赭黃袍其立志可見矣

思賢堂

郡齋後舊有思賢堂以祠韋白劉三太守後更名三賢紹興末洪內相景嚴為郡益以唐王常侍仲舒本朝范文正之像復號為思賢堂今叅政范公作記郡庠亦有三賢堂繪文正范公并安定胡先生及光

祿朱公像於其中

顧學正

顧襄字公甫為太學上舍生名聲藉甚士流皆推之登熙寧九年第調潤州丹徒尉召還為太學正元豐五年卒於京師時二親猶在鄭達夫太宰與公甫為同舍生以詩挽之云可



惜病相如誰尋封禪書公病瘍而卒雙親千里外一葉九秋餘風  
露翻歸旆塵埃鎖故廬虎邱山下路會葬有鄉車廣文官舍  
冷如冰幾歎朝衫脫未能忽買春田埋玉地猶懸絳帳讀書  
燈佳名空綴仙都石妙偈爭傳海寺僧一幅粉旌春水漫惜  
君誰不涕奔騰

鄭希尹

鄭景平字希尹居帶城橋為人剛正不詭隨蒞官有廉聲嘗  
爲大理每有疑獄中夜焚香露拜斬得其情以故人無冤死  
者旣而請老家居朝廷以其精力有餘落職致仕守鄱陽到  
官未半歲拂袖而歸先君與公厚善因問其故答曰天子命  
景平爲郡守當以撫字爲職乃不得行其志今日須金幾百  
兩明日須金幾千兩枯骨頭上打不出也景平後世要人身  
在其志竟不可奪也時朱勗用事勢可炙手士大夫俛節從  
之者甚多惟公始終無附意子細字天和

執爨詩

程光祿自幼穎悟年五六歲時戲劇竈下家奴媪之曰汝能  
狹劣爾豈解爲文章邪公怒曰吾豈不能家奴曰試爲我吟  
一燒火詩卽應聲曰吹火鶯脣斂投柴玉腕斜回看烟裏面  
恰似霧中花甫冠登第

王元之畫像

虎邱御書閣下有王黃州畫像東坡過蘇日見之自謂想其  
遺風餘烈願爲執鞭而不可得因爲之作贊今猶書其上



雙蓮堂

雙蓮堂在木蘭堂東舊芙蓉堂是也至和初光祿呂大卿濟叔以雙蓮花開故易此名楊備郎中有詩云雙蓮倒影面波光翠蓋風搖紅粉香中有畫船鳴鼓吹簷然驚起兩鴛鴦政和中盛密學李文作守亦產雙蓮范無外賦木蘭花詞云美蘭堂晝永晏清暑晚迎涼控水檻風簾千花競擁一朵偏雙銀塘盡傾醉眼訝湘娥倦倚兩霓裳依約凝情鑑裏竝頭宮面高粧蓮房露臉盈盈無語處恨何長甫翡翠憐紅鴛鴦妒影俱斷柔腸淒涼菱荷暮雨褪嬌紅換紫結秋房堪把丹青對寫鳳池歸去攜將

孫若虛滑稽

孫實字若虛早年英聲藉甚性好滑稽郡庠有同舍生牛某姓者因作牛秀才賦嘲之云腰帶頭垂尚有田單之火幘頭脚上猶聞竇戚之歌又作書語集句譏一老生云孜孜爲善雞鳴起先王之道斯爲美四十五十無聞焉斯亦不足畏也已樂圃先生爲教授知之命其父訓敕孫由此發憤游太學不數歲登第而歸嘗入朝爲寺丞後守台州卒

慧感夫人

慧感夫人舊謂之聖姑或以爲大士化身靈異甚著祝安上通守是邦事之尤謹每有水旱惟安上禱祈立驗後以剡薦就除台守旣至錢唐詰旦欲渡江夢一白衣婦人告之曰來日有風濤之險旣覺頗異之卒不渡至午颶風倏起果覆舟



數十獨安上得免一夕盜之祠中竊取其旛平旦廟史入視之見一人以旛纏其身環走殿中因執以問答曰某實盜也夜半幸脫已踰城至家矣今不知潛制於此神之威靈使然敢不伏辜建炎間敵兵將至城下有一居民平昔謹於奉事夢中告之曰城將陷矣速爲之避謹勿以此告人佛氏所謂劫數之說不可逃也不數日兵果至其它神驗不一後加封慧感顯祐善利夫人今叅政范公作記

### 元少保

元絳字厚之居第在帶城橋登天聖五年進士甲科初任金陵幕官尋卽進用屢爲藩郡帥時有傳儂智高餘黨寇二廣者遂以公知廣州而所傳乃妄因改之越州公謝上表云忽聞羽檄之音謂有龍編之警橫水光明之甲得自虛聲雲中赤白之囊偶爲危事橫水光明之甲乃唐時誤傳寇至事見李德裕獻替記人服其工公在金陵時王荆公之父益爲通守與公厚甚荆公旣相神宗一日欲謹選翰林學士公久在外老於從官荆公對曰有真翰林學士但恐陛下不能用爾況已作龍圖閣學士難下遷知制誥遂自外遷翰林學士中外大驚旣就列有稱職之譽公最長於四六多取古今傳記佳語爲之神宗友愛嘉岐二王不許出閣二王固辭後因改封先召公謂之曰可於麻詞中勿令更辭公遂草制其略云列第環宮彌聳開元之盛側門通禁其承長樂之顏神宗甚愛之自是二王不復辭未幾叅大政元豐中罷政知潁州時



以藩邸升爲順昌軍節度公作謝表云燾土立社是開王者之風乘龍御天厥應聖人之作按圖雖舊錫命惟新又曰與言駿命之慶基宜申中軍之望府謂文武之德順而聖唐虞之道明而昌合爲嘉名以侈舊服士大夫皆傳誦之後以太子少保致仕歸吳中公既還鄉與程光祿諸公爲九老會日以詩酒自娛年七十餘卒有玉堂集三十卷初公知荆南嘗夢至仙府與三人連書名旁有告之曰君三人蓋兄弟也覺而思之不知所謂既入翰林爲學士韓持國維楊元素繪在院一日因書奏列名三人偏傍皆從糸始悟夢中兄弟之意既而持國元素皆補外公亦尹京兆後三年復與元素還職而鄧文約綰相繼爲直院則三人之名又皆從糸蓋始終皆同以此知升沈進退決非偶然者許大夫選嘗作四翰林詩記其事公和云連名適似三株樹傳玩驚看五朵雲此亦一時之異也

仲殊

仲殊字師利承天寺僧也初爲士人嘗與鄉薦其妻以藥毒之遂棄家爲僧工於長短句東坡先生與之往來甚厚時時食蜜解其藥人號曰蜜殊有寶月集行於世慧聚寺詩僧字草堂以其喜作豔詞嘗以詩箴之云大道久凌遲正風還侈隳無人整頽綱目亂空傷悲卓有出世士蔚爲人天師文章通造化動與王公知囊括十洲香名翼四海馳肆意放山水灑脫無羈縻雲輕三事袖餅錫天下之詩曲相間作百紙頃



刻爲漢思洪泉瀉翰墨清且奇惜哉大手筆胡爲口柔詞願  
師持此才奮起革澆漓驚彼東山高圖祖進豐碑再續輔教  
編高步凌丹墀它日僧史上萬世爲著龜迦葉聞琴舞終被  
習氣隨伊子浮薄人贈言增忸怩倘能循我言拂日重光離  
老孛之言雖苦口殊竟莫之改一日造郡中接坐之間見庭  
下一婦人投牒立於雨中守命殊詠之口就一詞云濃潤侵  
衣暗香飄砌雨中花色添憔悴鳳鞋溼透立多時不言不語  
厭厭地眉上新愁手中文字因何不倩鱗鴻寄想伊只訴薄  
情人官中誰管閑公事後殊自經於枇杷下輕薄子更之曰  
枇杷樹下立多時不言不語厭厭地

如村

胡嶧字仲達五柳之子文與行皆能繼其父與方子通爲忘  
年交後以年格推調安遠尉非其志也乃取老杜諸孫貧無  
事宅舍如荒村之句自號如村老人治圃築室遺外聲利自  
放於閒適而終不出仕有文集二十卷號如村冗藁唯室先  
生及叅政周公葵皆爲作序子伯能登進士第

鄭毅夫吳江橋詩

鄭獬字毅夫嘗作吳江橋詩寄劉孜叔楸云三百闌干鎖畫  
橋行人波上踏靈鼇插天蟠螭玉腰澗跨海鯨鯢金背高路  
直鑿開元氣白影寒壓破大江豪此中自與銀河接不必仙  
槎八月濤劉時爲吳江尉亦有和篇皆刻之石鄭詩題云寄  
同年叔楸祕校刻於詩前具位加榜下二字於其上乃原父



之弟也

張幾道挽詩

張僅字幾道居萬壽寺橋與顧棠叔恩皆爲王荆公門下士  
荆公修三經義二公與焉幾道登第未幾捐館方子通作挽  
詩云吳郡聲名顧與張龍門當日共升堂青衫始見登華省  
丹旄俄聞入故鄉含淚孤兒生面垢斷腸慈母滿頭霜嗟君  
十載人間事不及南柯一夢長至今誦其詩者爲之出涕吳  
人日子通爲方挽詞幾道官至著作郎

范文正不取燒煉方

范文正少養於朱氏朱南京人文正幼年肄業京學同舍有  
病者親爲調藥以療病亟屬文正曰吾無以報子平生有一  
術遊遠方未嘗窮乏者用此術也今以遺子因授藥一囊方  
書一小冊文正不得已留之未嘗取視後二十餘年得其子  
還之封記如故

夜航船

夜航船唯浙西有之然其名舊矣古樂府有夜航船之曲皮  
日休荅陸龜蒙詩云明朝有物充君信樁酒三瓶寄夜航

俗語

吳人呼來爲釐始於陸德明詒我來牟蓋德明吳人也又吳  
人言罷則以休繼之始於吳王一日吳王語孫武子曰將軍  
罷休亦吳語也

方子通詩誤入荆公集



方子通一日謁荆公未見有詩云春江渺渺抱牆流烟草茸茸一片愁吹盡柳花人不見春旗催日下城頭荆公親書方冊間因誤載臨川集後人不知此詩乃子通作也

盧發運

公諱秉擢皇祐元年進士第元豐中爲發運使其父太中公退老公每歲上計得請歸鄉後帥涇原懇辭歸養屢賜手詔慰勉時以爲榮

大雲翁

林宓字德祖旦之子擢進士第爲常州教授在職六年學者信服大觀二年大比試決科者四十餘人於是賜詔曰閱前日賓興之數較其試中多寡口常州爲最苟依常格推恩非古人進賢受上賞之意特改宣德郎郡守因以進賢揭坊名於學之南郡人榮之後除河北路提舉學士任滿除開封府左司錄居數月浩然有歸志優詔如所請公旣勇退屏置朝服足不踐州縣舊隱在大雲坊因自號大雲翁卒年六十六葬博士塢平生好古嗜學有大雲集一百卷神宗皇帝聖訓錄一十卷

花客詩

張敏叔嘗以牡丹爲貴客梅爲清客菊爲香客瑞香爲佳客丁香爲素客蘭爲幽客蓮爲淨客酴醾爲雅客桂爲仙客薔薇爲野客茉莉爲遠客芍藥爲近客各賦一詩吳中至今傳播



中吳

平江本吳國在秦屬會稽郡東漢分會稽置吳郡陳爲吳州  
隋爲蘇州大業末復爲吳郡唐武德中復爲蘇州乾寧中錢  
氏據錢塘蘇湖之南悉其奄有後唐爲中吳軍節度皇朝興  
國中置平江軍節度又復爲蘇州嘗爲徽宗潛藩遂陞爲府  
祖姑教子登科

予之祖姑適知泉州德化縣李處道祖姑甚有文讀書通大  
義賦詩書字皆過人其子援登進士第乃祖姑所親教也晚  
而事佛誦蓮經皆千過嘗問法於圓照禪師師名之曰守安  
年幾七十而卒旣得疾卽屏藥餌書佛頂泥焚之灰爲丸并  
以燃燈法授援曰我死置灰丸懷中燃燈如法也因起坐誦  
大士名號久之而化旣小殮視其手指屈結皆成印相佛徒  
歎服沙門爲不可及張文潛學士爲墓志首記其事

范祕丞

范世京字延祖龍圖公之子登皇祐五年進士第調應天府  
柘城簿和州歷縣令時龍圖公出守四明公亟走膝下曰人  
子者事親之日少而事君之日多豈忍曠年失定省邪旣而  
龍圖公捐館扶喪歸鄉垢面跣足晝夜哀號不絕行道之人  
莫不嗟惻服除知秀州海鹽縣勸民孝友睦姻及耕桑之事  
治聲動浙右熙寧初朝廷銳意改作召公管勾湖北廣惠倉  
至京師論不合乃辭歸舊治海旁之民間公復來驩呼鼓枹  
已而有疾乞以本官歸田里乃卒詔授祕書丞致仕享年四



十一公居鄉與樂圃先生甚厚有文集若干卷藏于家

### 徐朝議

徐師閔字聖徒仕至朝議大夫退老于家日治園亭以文酒自娛樂時太子少保元公絳正議大夫程公師孟朝議大夫閻邱公孝終亦以安車歸老因相與繼會昌洛中故事作九老會章岵爲郡守大置酒合樂會諸老於廣化寺又有朝請大夫王玠承議郎通判蘇温與馬上賦詩爲信諸公皆屬而和之以爲吳門盛事元公少保和篇云五日佳辰郡政聞延賓談笑豁幽關闔門歌舞尊巵上林屋烟霞指顧間德應華星臨頽尾年拘皓髮下霜顏昌花美酒疎鐘永坐見斜暉隱半山方子通亦有和篇云使君瀟灑上賓間金地無人晝閉關風靜簫聲來世外日長仙境在人間詩成郢客爭揮翰曲罷吳姬一破顏此節東南無此會高名千古映湖山章牧以五日開宴故上詩皆及之

### 顏夫子

顏長民登元豐二年進士第三子采爲字亦相繼擢高科采字君用終提舉常平爲字仲謙終嚴陵守字字瑞中崇觀間有聲於太學士行甚美每試必居前列皆目之爲顏夫子人欲識其面而不可得旣登第滕樞密康許嫁以女尋卽下世

### 信義縣

崑山在蕭梁時分婁置縣號信義屬信義郡大同初分信義置崑山焉華亭舊亦爲蘇之屬邑或云嘗割崑山之境以縣



華亭今華亭亦有崑山時人嘗以片玉比機雲兄弟而以此爲北崑山縣舊有城古圖經云在縣東三百步今謂之東城者是也近歲耕者於薦嚴寺田中得城磚甚多及箭鏃以銅爲之識者疑其爲春秋時物今縣之西二十里許有村曰信義如婁縣之存舊名也俗遂訛爲鎮義汴人龔猗仕至殿中侍御史居於是村之南因插銀杏枝活時人異之目爲遇仙云

### 李無悔

李無悔名行中本雪川人徙居淞江高尚不仕獨以詩酒自娛晚治園亭號醉眠東坡先生與之游夜以詩贈之無悔有讀顏魯公碑詩云平生肝膽衛長城至死圖回色不驚世俗不知忠義大百年空有好詩名又賦佳人嗅梅圖云鬢眉猶髻縷金衣折得梅花第幾枝嗅盡餘香不回面思量何事立多時其詩意尚深遠大率類此

### 蟹

吳之出蟹舊矣吳越春秋云蟹稻無遺種又陸魯望集有蟹志云漁者緯蕭承其流而障之曰蟹斲又曰稻之登也率執一穗以朝其魁然後縱其所之今吳人謂之輸芒

### 大本錢王後身

圓照在靈巖時有一藍縷道人自號同水客往造其室中守門者莫能過旣而圓照屏侍者與語竊聽之者聞圓照末後一語云汝今幾甲子矣答云八萬四千恒河沙數甲子圓照



云八萬四千恒河沙數甲子以前又作麼生道拂袖而出云  
錢大錢大又待瞞人也當時疑圓照爲吳越後身道人爲洞  
竇

### 郊正夫失鶴詩

正夫童時作失鶴詩云久鎖沖天鶴金籠忽自開無心戀池  
沼有意出塵埃鼓翼離幽砌凌雲上紫臺應陪鸞鳳侶倦鳥  
任徘徊其志已不凡矣

### 黃姑織女

崑山縣東三十六里地名黃姑古老相傳云嘗有織女牽牛  
星降于此地織女以金篦劃河水湧溢牽牛因不得渡今廟  
之西有水名百沸河鄉人異之爲之立祠按荆楚歲時記黃  
姑者河鼓也牽牛謂之河鼓後人訛其聲爲黃姑潘子直云  
亦猶牽落之語轉呼爲牽郎耳鄉人因以名其地見於題詠  
甚衆古樂府云東飛百勞西飛燕黃姑織女時相見李太白  
詩云黃姑織女相去不盈尺李後主詩云迢迢牽牛星杳在  
河之陽粲粲黃姑女耿耿遙相望劉筠內翰詩云百勞東翥  
燕西飛又報黃姑織女期其它不能盡載雖非指此黃姑然  
得名之由亦可類推祠中列二像建炎兵火時士大夫多避  
地東岡有范姓者經從祠下題於壁閒云商飈初至月埋輪  
烏鵲橋邊綽約身聞道佳期唯一夕因何朝暮對斯人鄉人  
遂去牽牛像今獨織女存焉禱祈之間靈跡甚著每至七夕  
人皆合錢爲青苗會所收之多寡持盃玳問之無毫釐不驗



一方甚敬之上有廟記今不復存矣

### 孫積中

孫載字積中其曾祖漢英仕錢氏嘗爲蘇州崑山鎮防遏使故爲崑山人公幼岐嶷如成人旣學爲師友所推譽治平二年進士及第爲河中府戶曹更三守皆立威嚴者公獨與之爭曲直矯矯不少下終以此見知或稱薦之中書檢正官察訪關中辟公爲官屬公務伙助之亦不苟與之合乾祐縣去永豐最遠青苗法行乾祐不以予民察訪怒移其令檄公往案之公還言邑小民貧其徒以黍麥博易爲生且法之初民未知稱貸於公家爲利令無罪且還其任用薦者遷官知湖州德清縣公聽斷精明不專任刑罰開說其是非出於至誠訟有累年不決者聞公一言感悟相捨去熙寧八年吳越飢獨縣中熟公勸大家乘時倍糴得米一十餘萬斛明年春米價騰踴公平其直使糶賴以全活者至不可數計其他便民者別有十數事德清人至今德公又用薦者遷官知考城縣官制行換奉議郎其治考城如德清於口日也以最聞縣四鄰皆重法地素饒盜公明常格嚴保伍奸無所囊橐一日都監與尉來告盜集境上將以上元掠近郭至期公張燈與其僚樂飲許民嬉游不禁夜如故事盜叵測遂遁去迄公受代亦無復鼠竊者府界提點薦公于朝他使者亦相繼上公治狀神宗出氏名付中書蓋欲用公矣未幾除廣東路常平召見便殿以遣之二廣使者春夏例簡出公至則犯隆暑徧行



所部宣布德意哲宗卽位轉承議郎諸路常平官廢公赴吏部授通判陝州移廣東轉運判官於是公去嶺五年矣吏有常不快於公者頗欲棄官公聞而慰留之乃舉焉紹聖初復諸路常平官除公河北西路改知海州已而除沂州興學養士走書幣招禮宿儒爲學者師表治務大體遷朝奉大夫知婺州移淮東路轉運判官又移淮西路提點刑獄徽宗卽位遷朝請大夫知亳州言者謂公嘗附薦元祐黨人得提舉杭州洞霄宮卽歸岷山日與親戚間里置酒棊奕道故舊爲樂任且滿本路使某等言公先朝所選擇名在循吏年雖高精力幸未甚衰願使再任以示優老之意詔從之大觀中遷朝議大夫未幾公亦自上章乞守本官致仕公體素無疾先一月至其先人墳隴徧謁諸所往來者若將別然旣亟呼妻子與訣屬以後事問日早晏盥手焚香卽寢而逝享年七十有五葬高景山公天資樂易於吏治尤所長使四路典三大郡咸著循跡每遇物無伎害所至汲引其屬士大夫受薦者至四百餘人多知名且貴顯於世者自少喜讀易慕唐人爲詩著易釋解五卷文集五十卷藏于家

### 王主簿

王仲甫字明之岐公之猶子風流翰墨名著一時後客于吳門嘗有所受往京師爲岐公強留之逾時不返因作詩云黃金零落大刀頭玉筋歸期劃到秋紅錦寄魚風逆浪碧簫吹鳳月當樓伯勞知我經春別香蠟窺人一夜愁好去渡江千



里夢滿天梅雨是蘇州此詩效古樂府藁砧今何在體人皆愛其巧其歿也丁永州注葆光祭之有云爽秀豪拔出於天資談經咏史博識周知文華自得不務競時古格近體率意一揮金玉鏘揚組繡陸離世俗所得特其歌辭又云生習華貴不見艱巖徘徊鳴閣出入鳳池乘輿南游曠達不羈朝賞夕晏選勝搜奇擺脫冠裳卻去輪蹄不驚榮辱不口是非擾擾萬緒付于一卮頽然終日去智忘機王之爲人於此可見矣

著作王先生

著作王先生程門高第諱蘋字信伯世居福之福清父仲舉徙平江政和元年卒葬吳縣橫山桃花塢誌其墓者江公望書其誌者陳瓘也先生爲人清純簡易達於從政有憂時愛君之心有開物成務之學高宗駐蹕平江守臣孫佑薦於朝賜對前後所上疏劄類切于時宜聖諭以通儒目之賜進士出身除祕書省正字兼史館校勘遷著作佐郎受勅正朱墨史官至左朝奉郎與門人陳長方楊邦弼講道于鎮澤如楊龜山尹和靜胡文定皆深推讓吳中道學之傳莫盛于先生紹興二十三年卒于家葬湖州長興縣和平鎮茅栗山門人章憲撰誌吳中閩中皆祠于學其子大本兩浙安撫司參議先生平生所註論語集解古今語說著作文集并高宗所賜勅及遺像震澤記善錄至今藏于家子孫世守府城德慶坊故居云



中吳紀聞卷四





